

摘藻堂四庫全書薈要

集部

欽定四庫全書薈要

集部

御定詠物詩選卷三百三十二

欽定四庫全書薈要卷一萬八千八百五十四

集部

御定佩文齋詠物詩選卷二百三十二

佛寺類

五言古

開善寺法會

梁蕭統

棲鳥猶未翔命駕出山莊
詰屈登馬嶺回互入羊腸
稍看原藹藹漸見岫蒼蒼
落星埋遠樹新霧起朝陽
陰池宿早鴈寒風催夜霜
茲地信閒寂清曠惟道場
玉樹疏

卷二百三十一
璃水羽帳鬱金牀紫柱珊瑚地神幢明月璫牽蘿下石
磴攀桂陟松梁澗斜日欲隱煙生樓半藏千祀終何邁
百代歸我皇神功照不極睿鏡湛無方法輪明暗室慧
海渡慈航塵根久未洗希霑垂露光

遊光宅寺詩應令

梁簡文帝

陪遊入舊豐雲氣鬱青蔥紫陌垂青柳輕槐拂慧風八
泉光綺樹四柱暖臨空翠網隨煙碧丹花共日紅方欣
大雲溥慈波流淨宮

奉和往虎窟山寺

梁陸罩

雞鳴動睟駕禁苑睠晨遊
朱鑣陵九達青蓋出層樓
歲華滿芳岫虹彩被春洲
葆吹臨風遠旌羽映九旂
喬枝隱脩逕曲澗聚輕流
徘徊花草合瀏亮鳥聲遒
金盤響清梵涌塔應鳴桴
慧雲方靡靡法水正悠悠
實歸徒荷教信解愧難酬

奉和往虎窟山寺

梁王回

美境多勝跡道場實茲地
造化本靈奇人功兼製置
房

廊相映屬階閣並殊異高明畱睿賞清淨穆神思豫遊
窮嶺歷藉此方春至野花奪人眼山鶯紛可喜風景共
鮮華水石相輝媚法像無塵染真僧絕名利陪遊既伏
心聞道方刻意

仰同令君攝山棲霞寺山房夜坐六韻

陳
徐孝克

戒壇青石路靈相紫金峰影盡皈依鵠餐迎守護龍晨
朝宣寶偈寒夜斂疎鐘雞蘭靜含握仁智獨從容五禪

清慮表七覺蕩心封願言於此處攜手屢相逢

靜卧棲霞寺房望徐祭酒

陳江總

絕俗俗無侶脩心心自齋連崖夕氣合虛宇宿雲靈卧
藤新接戶歌石久成階樹聲非有意禽戲似忘懷故人
市朝狎心期林壑乖惟憐對芳杜可以爲吾儕

經始興廣果寺題愷法師山房

江總

息舟候香埠悵別在寒林竹近交枝亂山長絕逕深輕
飛入定影落照有疎陰不見投雲狀空畱折桂心

和崔侍中從駕經山寺

北齊
蕭 慤

鉤陳夜警徼河漢曉縱橫
遊騎騰文馬前驅轉翠旌
野禽喧曙色山樹動秋聲
雲表金輪見巖端畫栱明
塔疑從地湧蓋似積香成
泉高下溜急松古上枝平
儀台多壯思麗藻蔚緣情
自嗤非照乘何以繼連城

雲居寺高頂

北周
王 褒

中峰雲已合絕頂日猶晴
邑居隨望近風煙對眼生

謁慈恩寺題樊法師房

唐
太 宗

停軒觀福殿遊目眺皇畿法輪含日轉花蓋接雲飛翠
煙香綺閣丹霞光寶衣旛虹遙合彩空外迴分暉蕭然
登十地自得會三歸

題終南翠微寺空上人房

唐 孟浩然

翠微終南裏雨後宜返照閉關久沈冥杖策一登眺遂
造幽人室始知靜者妙儒道雖異門雲林頗同調兩心
喜相得畢景共談笑暝還高窗眠時見遠山燒緬懷赤
城標更憶臨海嶠風泉有清音何必蘇門嘯

宿天竺寺

唐 陶翰

松柏亂巖口山西微徑通天開一峰見宮闕生虛空正
殿倚霞壁千樓標石叢夜來猿鳥靜鐘梵寒雲中岑翠
暎湖月泉聲雜谿風心超諸境外了與懸解同明發氣
候改起視長崖東湖色濃蕩漾海光漸瞳矇葛仙跡尚
在許氏道猶崇獨往古來事幽懷期二公

遊天竺寺

唐 崔顥

晨登天竺山山殿朝陽曉屋泉爭噴薄江岫相縈繞直

上孤頂高平看衆峰小南州十二月地煖冰雪少青翠滿寒
山藤蘿覆冬沼花龕瀑布側青壁石林杪鳴鐘集人天施飯
聚猿鳥洗意歸清淨澄心悟空了始知世上人萬物一何擾

藍田山石門精舍

唐王維

落日山水好漾舟信歸風探竒不覺遠因以緣源窮遙
愛雲木秀初疑路不同安知清流轉偶與前山通捨舟
理輕策果然愜所適老僧四五人逍遙蔭松柏朝梵林
未曙夜禪山更寂道心及牧童世事問樵客暝宿長林

下焚香卧瑶席澗芳襲人衣山月暎石壁再尋畏迷誤
明發更登歷笑謝桃源人花紅復來覲

至閒居精舍呈正上人

唐 儲光義

太室三招提其趣皆不同不同非一趣況是天游宮雙
嶺前夾門閣道復橫空寶坊若花積宛轉不可窮流泉
自成池青松信饒風秋晏景氣迴晶明丹素功近將隱
者鄰遠與西山通大師假慧照念以息微躬

同羣公題中山寺

唐 高 適

平原十里外稍稍雲巖深邃及清淨所都無人世心名
僧既禮謁高閣復登臨石壁倚松逕山田多栗林超遙
盡巘粵逼側仍嶇嶇吾欲休世事於焉聊自任

青龍寺曇壁上人院集

唐 裴迪

靈境信爲絕法堂出塵氛自然成高致向下看浮雲迤
邐峰岫列參差間井分林端遠堞見風末疎鐘聞吾師
久禪寂在世超人羣

題鶴林寺

唐 綦母潛

道門隱形勝向背臨層霄松覆山殿冷花藏谿路遙
珊寶旛挂焰焰明燈燒遲日半空谷春風連上潮少憑
水木興暫令身心調願謝攜手客茲山禪誦饒

送崔十二遊天竺寺

唐李 白

遙聞天竺寺夢想懷東越每年海樹霜桂子落秋月送
君遊此地已屬流芳歇待我來歲行相隨浮溟渤

與從姪杭州刺史良遊天竺寺 李 白

挂席凌蓬丘觀濤憇樟樓三山動逸興五馬同遨遊天

竺森在眼松風颯驚秋覽雲測變化弄水窮清幽疊嶂
隔遙響當軒寫歸流詩成傲雲月佳趣滿吳洲

安州般若寺水閣納涼喜遇薛員外乂

李白

翛然金園賞遠近含晴光樓臺成海氣草木皆天香忽
逢青雲士共解丹霞裳水退池上熱風生松下涼吞討
破萬象褰窺臨衆芳而我遺有漏與君用無方心垢都
已滅永言題禪房

出關經華嶽寺訪法華雲公

唐岑參

野寺聊解鞍偶見法華僧開門對西嶽石壁青峻層竹
徑厚蒼苔松門盤紫藤長廊列古畫高殿懸孤燈五月
山雨熱三峰火雲蒸側聞樵人言深谷猶積冰久願尋
此山至今嗟未能謫官忽東走王程苦相仍欲去戀雙
樹何由窮一乘月輪吐山郭夜色空清澄

聞崔十二侍御灌口夜宿報恩寺

岑參

聞君尋野寺便宿支公房
谿月冷深殿江雲擁迴廊
然燈松林靜煮茗柴門香
勝事不可接相思幽興長

題華嚴寺環公禪房

岑參

寺南幾十峰峰翠晴可掬
朝從老僧飯昨日崖口宿
錫杖倚孤松繩牀映深竹
東谿草堂路來往行自熟
生事在雲山誰能復羈束

遊龍門奉先寺

唐杜甫

已從招提遊更宿招提境
陰壑生靈籟月林散清影
天

闕象緯逼雲卧衣裳冷欲覺聞晨鐘令人發深省

題棲霞寺

唐張暈

躋險入幽林翠微含竹殿泉聲無休歇山色時隱見潮
來雜風雨梅落成霜霰一從方外遊頓覺塵心變

奉陪蕭使君入鮑達洞尋靈山寺

唐劉長卿

山居秋更鮮秋江相映碧獨臨滄洲路如待挂帆客遂
使康樂侯披榛著雙屐入雲開嶺道永日尋泉脈古寺

隱青冥空中寒磬夕蒼苔絕行逕飛鳥去無跡樹杪下
歸人水聲過幽石任情趣愈遠移步奇屢易蘿木靜蒙
蒙風煙深寂寂徘徊未能去畏共桃源隔

莊嚴精舍遊集

唐 韋應物

良遊因時暇乃在西南隅綠煙凝層城豐草滿通衢精
舍何崇曠煩跼一弘舒架虹施廣蔭構雲眺八區即此
塵境遠忽聞幽鳥殊新林泛景光叢綠含露濡永日亮
難遂平生少歡娛誰能遽還歸幸與高士俱

行寬禪師院

韋應物

北望極長廊，斜扉掩叢竹。
亭午一來尋院幽，僧亦獨唯
聞山鳥啼愛此林下宿。

遊終南龍池寺

唐孟郊

飛鳥不到處，僧房終南巔。
龍在水長碧，雨開山更鮮。
步出白日上，坐依清谿邊。
地寒松桂短，石險道路偏。
晚磬送歸客，數聲落遙天。

偶遊石盦僧舍

唐杜牧

敬岑草浮光句
沁水解脈悵鬱乍
怡融凝嚴忽頽坼
梅顙煖眠酣風緒
和無力鳬浴漲汪
汪離嬌邨幕幕落
日
美樓臺輕煙飾阡
陌漱綠古津遠積
潤苔基釋孰謂漢
陵人來作江汀客
載筆念無能捧籌
慙所畫任轡偶追
間逢幽果遭適僧
語淡如雲塵事繁
堪織今古幾輩人
而我何能息

同曼叔遊菩提寺

宋韓維

高城如破崖寺帶喬木古禪房掩清畫
佛畫剝寒雨荒

池野蔓合濁水佳蓮吐蕭條聯騎遊澹泊對僧語秋風
日夕好勝事從此數

端午遍遊諸寺得禪字

宋 蘇軾

肩輿任所適遇勝輒畱連焚香引幽步酌茗開淨筵微
雨止還作小窗幽更妍盆山不見日草木自蒼然忽登
最高塔眼界窮大千卞峰照城郭震澤浮雲天深沈旣
可喜曠蕩亦所便幽尋未云畢墟落生晚煙歸來記所
歷耿耿清不眠道人亦未寢孤燈同夜禪

峽山寺

蘇軾

天開清遠峽地轉凝碧灣我行無遲速攝衣步孱顏山
僧本幽獨乞食况未還雲碓水自舂松門風爲闌石泉
解娛客琴筑鳴空山佳人劒翁孫遊戲暫人間忽憶嘯
雲侶賦詩畱玉環林深不可見霧雨霾髣髴

香積寺

宋文同

道險轉詰曲山深愈巘岼行松耳目清入竹襟袖寒殿
閣紅芙蓉嵒巖碧琅玕高僧把金字擁衲對雲看

妙光菴

宋 孫覲

孤煙抱水邨落日滿雲樹亂山如連環楊柳是門處青
繚竹谿灣翠點苔石路鐘魚寂無聲白日掩僧戶茗椀
酌雲腴香篆擢煙縷坐穩不知夕炯炯山月吐

過報德菴

宋 劉子翬

循谿踏危砵路入篋簾臨森森翠櫺間一榦橫清雨茶
煙日月靜石壁軒扉古盡茲北山傍小勝無遺取

落星寺

宋 朱子

浩浩長江水東逝無停波及此一回薄湖平煙浪多孤
嶼屹中川層臺起周阿晨望愛明滅夕游驚蕩磨極目
青冥茫回瞻碧嵯峨不復車馬迹惟聞榜人歌我願辭
世紛茲焉老漁蓑會有滄浪子鳴舷夜相過

臨谿寺

宋 范成大

萬山遶潺湲二水奔瀕洞亭亭林中寺金碧燦欄棟解
鞍得蒲團卧受瓦爐供少捐一炊頃暫作百年夢無人
自驚覺幽禽正清哢倦客如殘僧無力供世用此行端

爲山紫翠迭迎送漱井出門去驚塵撲飛鞚

少林

金
元好問

雲林入清深禪房坐蕭爽澄泉潔餘習高鳥喚長往我
無玄豹姿謾有紫霞想回首山中雲靈芝日應長

遊雲水菴

元
劉因

乘春奮幽潛觀化登丘山哀淙聞遠壑息駕思雲關墾
石密松桂結屋珍茅管生煙紛漠漠激流散潺潺山石
浮壽色澗木榮歡顏覽物有真意撫節驚循環悠然千

載情儼若盤石間眷焉欲晤語古人何當還

宿福海寺

元戴表元

斲巖蒼龍角汲流紫雲根道人絕俗自然無耳喧屋脊挂脩嶺一日過千轅此中但高卧松風有清言聽之亦無有風定松在門炊成我欲去獨鶴鳴朝暾

慶壽僧舍即事

元趙孟頫

白雨映青松蕭颯灑朱閣稍覺暑氣銷微涼度疎箔客居秋寺古心跡俱寂寞夕蟲鳴階砌孤螢炯叢薄展轉

懷故鄉時聞風鳴鐸

至正己亥四月廿二日宿翠峰禪室登雷雲閣
數日與淨蓮公

元
高克恭

米老天機清夢入煙雲
窟山河大地影玻瓈
鏡中出任
自選勝場莫浪翻墨汁
今於西湖濱割取南半壁

宿棲真院分韻得獨字

元
于石

空翠冷滴衣石蘚滑吾足偶隨白雲去
棲此林下屋樓
影挂斜陽鐘聲出深竹
山僧老面壁誰與伴幽獨
分我

雲半間歌枕聽飛瀑

再遊石壁寺

于石

曾爲石壁遊更借僧房宿樓閣倚林腰谿山醒塵目敲
門尋舊僧清響應林谷老僧不厭客分我雲半屋禪月
豈後身尚餘詩滿腹疑我亦荀鶴再與賦漢牧汲井晝
煮茶洗鉢夜分粥山空人語寂邀我入深竹獨抱無絃
琴不唱浮生曲月樹影參差風灘聲斷續條然出塵表
身世轉幽獨明朝出山去無言笑相矚江上石牛眠秋

草爲誰綠

題雲菴

元李存

夜宿雲菴中白雲滿牀頭客來雲不語客去雲不留
日在山下白雲何處求

福山菴

元黃清老

晨光海上來雲氣升萬壑雞鳴落花中殘鐘度城郭
菴僧戴星出我自飯藜藿寧知天地心但有山水樂
書燈
夜搖動霧氣侵几閣開扉得新月欲掩見棲雀煙霞暫

相違筆硯底有託但畱松間雪付與雙白鶴庭柯換故
葉林竹脫新籜何日芝草開拏舟赴前約

過廣福寺石屏山房懷曾子白脩撰陳伯清侍

講

元陳高

游行滯春雨憩息依禪林寺門閉寥闌崖石聳欽崙幽
禽飛復止脩竹何森森賞寂屏塵慮觀空起遐心分榻
坐雲影巡廊步晚陰緬懷玉堂彥曾此共登臨惆悵撫
遺跡石徑蒼苔深

遊惠山寺

元鄭元祐

百里盡平壤茲山忽中蟠
豁衍得宏深紆徐納平寬
僧坊隱其腹崇構居桓桓
立神衛觚稜緣雲置闌干
我來玄冬交榜舟起微瀾
天連黃沙白露委青林
丹地無車馬塵松筠政堅
完蒼然後彫意彼此不厭
看稍稍涉其厓探源汲清
寒恭惟桑苧翁出處良獨
難帝青九萬里冥飛見脩
翰空畱雪泥跡莫究清淨
觀煮茗滌煩暑晏然有餘
歡

同子充濬仲遊北山夜宿覺慈院

元戴良

窮年厭喧囂，今晨愜游衍。豈伊清曠懷，直爲朋知展。
指塗陽已升，入谷光未顯。涉流旣百折，尋山亦千轉。
停策樹頻倚，攀林芳屢褰。路夷始出幽，山暝復凌緬。
佛廬旣棲薄，僧榻聊息偃。地僻心自怡，俗遠慮乃遣。
明發有佳趣，勝處將歷踐。

楞伽寺得月臺

元僧宗衍

月出湖水湄清輝映林屋山明秋樹靜照見幽鳥宿開門誰遣入俯礪近可掬道人猶未眠經聲出深竹

晨詣祥符寺

明 劉基

上馬雞始鳴入寺鐘未歇草際起微風林端淡斜月僧房湛幽寂假寐待明發松徑斷無人經聲在清樾

南峰寺

明 高啓

樵歸衆山昏天峰尚餘景欲投石門宿更度西南嶺遠聞雲間鐘蘿徑入寺永懸燈照靜室一禮支公影鳥鳴

澗壑空泉響，窗戶冷對此。問山僧何如，沃洲境。

楞伽寺

高啟

夕陽西下嶂，返照東湖水。來尋古寺游，楓葉秋幾里。叩門山猿驚，維馬林鳥起。鐘聲出煙去，半落漁舟裏。楞伽義未曉，塵累方自恥。欲打塔銘碑，從僧乞山紙。

過雲巖

在虎丘寺

明張羽

逶迤度前峰，到寺行屢歇。齋庖竹外煙，汲路松間雪。覩水悟真源，聞香解禪悅。欲共老僧言，相對還無說。

行上人蕭然齋

明徐賁

高林灑繁露閒齋自翛然俄聞一葉墜應我琴中絃野
水寒欲淺遙岑秋更妍清晨理梵罷窗扉靄餘煙

金雞巖僧室

明林鴻

遠公青蓮宇百尺構雲闕一徑入松蘿山泉濯苔髮石
房彈玉琴清響在林樾夜來滄海寒夢遶波上月微吟
白雲篇高興了未輟未能悟聲聞安得離言說

宿黃梅五祖寺

林鴻

佛祖說法處迴與諸天鄰
珠宮歷浩劫桂殿餘真身
登攀訪靈異禮謁知宿因
地遠泉石怪人閒猿鳥馴
松杉覆窗戶濕竹清衣巾
花雨出深夜天香來暮春
久知簪組妄思與緇錫親
所希慧燈影爲余照迷津

宿夾江寺

明方孝孺

窗開覺山近院涼知雨足
淡月透疎櫺流螢度深竹
心空慮仍澹神清夢難熟
起坐佛燈前閒抽易書讀

遊君山寺

明薛瑄

爲愛湖中山遂尋山下路躋攀轉幽邃澗谷亦回互石
磴足莓苔青林雜煙霧前行如有窮嵐嶺乍分布招提
壓重湖千里周一顧孤峯四無根形氣自依附山僧復
導我窈窕更徐步疎籬野蔓懸老圃寒泉注徑轉山房
深重與絕境遇白雲簷外生清風竹間度庭花雜無名
歲晏色猶故澄心得妙觀忘言契良晤愛此林壑清遂
薄塵俗務重來待何時尚子畢嫁娶

天界寺

明
蔡羽

秋晨慕虛覽梵宇謝埃鬱前壠未及踰中林庶歎述入
門躡颺颺循隕多局鐫紫院陰霞興瑤階錦苔出問柏
知僧年藉花蔭佛日晝憇夕忘返神恬形寡役懺往坐
獨冥玩空塵徐拂終寓豈不歡旋興未能釋

秋夜宿東白啓師方丈

明沈遇

竹梧滿秋庭蕭蕭涼氣早孤燈照跣趺高僧坐來曉風
清鶴夢醒雲淡鐘聲杳塵事永相忘心空衆緣了

宿牛首寺

明陳鐸

到寺萬緣絕蕭然宿峰頂蒼蒼野色新漠漠秋煙暝相
期話三生夜坐石根冷微涼入虛闌老鶴語桐井支郎
翻經處松子落古鼎白露下高空濕雲壓幽境望極巔
屋前寒籬眇邛徑談久明月來照我天地靜自汲石泉
水同僧淪佳茗天風在林末空翠散復整一乘演微機
開豁自慙省疎竹何蕭蕭雲房亂燈影

自茶磨入治平寺

明
程嘉燧

日晃山路閒林木紛如結環溝引湖流經橋見曲折路

枉寺門出高榆對森列連岡亘城隄缺斷宛當闌斜日
射山翠玲瓏暎松徹香氣行客聞心閒忘分別

過高峰菴

明 吳鼎芳

林迴覺路枉路枉亦自適光風不作寒吹煙半晴濕澗
春多異芳嶺月少行跡犬吠空山雲山僧杖藜出

棲雲寺

明 徐 勵

出自東郊門蘿徑轉幽邃剎影入層雲雞聲落空翠鐘
響答松濤爐煙和花氣斜日下遙岑殘僧獨歸寺

七言古

大覺高僧蘭若

唐 杜甫

巫山不見廬山遠，松林蘭若秋風晚。
一老猶鳴日暮鐘，諸僧尚乞齋時飯。
香爐峰色隱晴湖，種杏仙家近白榆。
飛錫去年啼邑子，獻花何日許門徒。

題台州隱靜寺

唐 王建

隱靜靈山寺，天鑿杯渡飛來建。
巖壑五峰直上插銀河，一澗當空瀉寥廓。
崆峒黯淡碧琉璃，白雲吞吐紅蓮閣。

不知勢壓天幾重鐘聲常在月中落

和丁寶臣遊甘泉寺

宋 歐陽脩

江上孤峰蔽綠蘿縣樓終日對嵯峨叢林已廢姜祠在
事迹難尋楚語訛空餘一派寒巖側澄碧泓渟涵玉色
野僧豈解惜清泉蠻俗那知爲勝迹西陵老令好尋幽
時共登臨向此遊歌危一徑穿林樾盤石蒼苔畱客歇
山深雲日變陰晴澗柏巖松度歲青谷裏花開知地煖
林間鳥語作春聲依依渡口夕陽時却望層巒在翠微

城頭暮鼓休催客更待橫江弄月歸

二十七日自陽平至斜谷宿於南山中蟠龍寺

宋
蘇軾

橫槎晚渡碧澗口騎馬夜入南山谷谷中暗水響龍瀧
嶺上疎星明煜煜寺藏巖底千萬仞路轉山腰三百曲
風生飢虎嘯空林月黑驚麕竄脩竹入門突兀見深殿
照佛青燐有殘燭媿無酒食待遊人旋斫杉松煮谿菽
板閣獨眠驚旅枕木魚曉動隨僧粥起觀萬瓦鬱參差

目亂千巖散紅綠門前商賈負椒苐山後咫尺連巴蜀
何時歸耕江上田一夜心逐南飛鵠

自普照遊二菴

蘇軾

長松吟風晚雨細東菴半掩西菴閉山行盡日不逢人
裊裊野梅香入袂居僧笑我戀清景自厭山深出無計
我雖愛山亦自笑獨往神傷後難繼不如西湖飲美酒
紅杏碧桃香覆髻作詩寄謝採薇翁本不避人那避世

五言律

遊梵宇三覺寺

唐王勃

香閣披青磴，瑤臺控紫岑。
葉齊山路狹，花積野壇深。
羅幌棲禪影，松門聽梵音。
遽忻陪妙躅，延賞滌煩襟。

陪潤州薛司空丹徒桂明府遊招隱寺

唐駱賓王

共尋招隱寺，初識戴顓家。
還依舊泉壑，應改昔雲霞。
綠竹寒天筍，紅蕉臘月花。
金繩儻畱客，爲繫日光斜。

夏日遊暉上人房

唐陳子昂

山水開精舍琴歌列梵筵人疑白樓賞地似竹林禪對
戶池光亂交軒巖翠連色空今已寂乘月弄澄泉

奉和聖製同皇太子遊慈恩寺應制

唐
沈佺期

肅肅蓮花界熒熒貝葉宮金人來夢裏白馬出城中湧
塔初從地焚香欲徧空天歌應春籥非是爲春風

遊少林寺

沈佺期

長歌遊寶地徙倚對珠林鴈塔丹青古龍池歲月深紺

園澄夕霽碧殿下秋陰歸路煙霞晚山蟬處處吟

樂城白鶴寺

沈佺期

碧海開龍藏青雲起鴈堂潮聲迎法鼓雨氣濕天香樹
接前山暗谿承瀑水涼無言謫居遠清淨得空王

遊韶州廣界寺

唐
宋之問

影殿臨丹壑香臺隱翠霞巢飛含象鳥砌蹋雨空花寶
鐸搖初霽金池映晚沙莫愁歸路遠門外有三車

奉和聖製閏九月九日登莊嚴總持二寺閣

宋之問

閏月再重陽仙輿歷寶坊帝歌雲稍白御酒菊猶黃風
鐸喧行漏天花拂舞行豫遊多景福梵宇日生光

幸岳寺應制

宋之問

暫幸珠筵地俱憐石瀨清汎流張翠幕拂迴挂紅旌雅
曲龍調管芳樽蟻泛觥陪歡玉座晚復得聽金聲

宿雲門寺閣

唐孫逖

香閣東山下煙花象外幽懸燈千嶂夕卷幔五湖秋畫

壁餘鴻鴈紗窗宿斗牛更疑天路近夢與白雲遊

同皇甫兵曹天宮寺浴室新成招友人賞會

唐寇坦

溫室歡初就蘭交託勝因共聽無漏法兼濯有爲塵水
潔三空性香霑四大身清心多善友頌德慰同人

題義公禪房

唐孟浩然

義公習禪處結構依空林戶外一峯秀階前衆壑深夕
陽連雨足空翠落庭陰看取蓮花淨方知不染心

宿立公房

孟浩然

支遁初求道深公笑買山何如石巖趣自入戶庭間苔
澗春泉滿蘿軒夜月閒能令許玄度吟卧不知還

遊景光寺

孟浩然

龍象經行處山腰度石關屢迷青嶂合時愛綠蘿閒宴
息花林下高談竹嶼間寥寥隔塵事疑是入雞山
江夏陪長史叔及薛明府宴興德寺南閣

唐

李白

紺殿橫江上青山落鏡中岸迴沙不盡日映水成空天
樂流香閣蓮舟颺晚風恭陪竹林宴畱醉與陶公

宿龍興寺

唐
綦母潛

香刹夜忘歸松青古殿扉燈明方丈室珠繫比丘衣白
月傳心淨青蓮喻法微天花落不盡處處鳥銜飛

題靈隱寺山頂禪院

綦母潛

招提此山頂下界不相聞塔影挂清漢鐘聲和白雲觀
空靜室掩行道衆香焚且駐西來駕人天日未曛

過香積寺

唐王維

不知香積寺數里入雲峰
古木無人徑深山何處鐘
泉聲咽危石日色冷青松
薄暮空潭曲安禪制毒龍

登辨覺寺

王維

竹徑從初地蓮峰出化城
窗中三楚盡林外九江平
嫩草承趺坐長松響梵聲
空居法雲外觀世得無生

過感化寺曇興上人山院
王維

暮持筇竹杖相待虎谿頭
催客聞山響歸房逐水流
野

花叢發好谷鳥一聲幽夜坐空林寂松風直似秋

登少室山寺

唐褚朝陽

飛閣青霞裏先秋獨早涼天花映窗近月桂拂簷香
華嶽三峯小黃雲一帶長空聞指歸路煙處有垂楊

遊感化寺曇興上人山院

唐裴迪

不遠灞陵邊安居向十年入門穿竹徑畱客聽山泉
鳥囀深林裏心閒落照前浮名竟何益從此願棲禪

登總持閣

唐岑參

高閣逼諸天登臨近日邊
晴開萬井樹愁看五陵煙
檻外低秦嶺窗中小渭川
早知清淨理常願奉金仙

山寺

唐杜甫

野寺殘僧少山園細路高
麝香眠石竹鸚鵡啄金桃
亂水通人過懸崖置屋牢
上方重閣晚百里見纖毫

題玄武禪師屋壁

杜甫

何年顧虎頭滿壁畫滄洲
赤日石林氣青天江海流
錫飛常近鶴杯渡不驚鷗
似得廬山路真隨惠遠遊

後遊脩覺寺

杜甫

寺憶曾遊處，橋憐再渡時。
江山如有待，花柳更無私。
野潤煙光薄，沙暄日色遲。
客愁全爲減，捨此復何之？

望兜率寺

杜甫

樹密當山徑，江深隔寺門。
霏霏雲氣重，閃閃浪花翻。
不復知天大，空餘見佛尊。
時應清盥罷，隨喜給孤園。

上牛頭寺

杜甫

香山意不盡，袞袞上牛頭。
無復能拘礙，真成浪出遊。
花

濃春寺靜竹細野池幽何處鶯啼切移時獨未休

和裴迪登新津寺寄王侍郎

杜甫

何限倚山木吟詩秋葉黃蟬聲集古寺鳥影度寒塘風
物悲遊子登臨憶侍郎老夫貪佛日隨意宿僧房

已上人茅齋

杜甫

已公茅屋下可以賦新詩枕簟入林僻茶瓜畱客遲江
蓮搖白羽天棘蔓青絲空忝許詢輩難酬支遁辭

題破山寺後院

唐常建

清晨入古寺初日照高林曲徑通幽處禪房花木深山
光悅鳥性潭影空人心萬籟此俱寂惟聞鐘磬音

奉陪韋潤州過鶴林寺

唐
李嘉祐

野寺江城近雙旌五馬過禪心超忍辱梵語問多羅松
竹閒僧老雲煙晚日和寒塘歸路轉清磬隔微波

宿北山禪寺蘭若

唐
劉長卿

上方鳴夕磬林下一僧還密行傳人少禪心對虎閒青
松臨古路白日滿寒山舊識窗前桂經霜更待攀

題精舍寺

唐 錢起

勝景不易遇入門神頓清
房房占山色處處分泉聲
詩思竹邊得道心松下生
何時來此地擺落世間情

題僧房

唐 韓翃

披衣聞客至闕鎖此時開
鳴磬夕陽盡捲簾秋色來
名香連竹徑清梵出花臺
身在心無住他方到幾迴

題龍興寺澹師房

韓翃

雙林彼上人詩興轉相親
竹裏經聲晚門前山色春
卷

簾苔點淨下筋藥苗新記取無生理歸來問此身

同中書劉舍人題青龍寺上方 韓 翃

西掖歸來後東林靜者期遠峰春雪裏寒竹暮天時笑
說金人偈閒聽聽寶月詩更憐茶興在好出下方遲

題慈恩寺竹院

韓 翃

千峰對古寺何異到西林幽磬蟬聲下閒窗竹翠陰詩
人謝客興法侶遠公心寂寂爐煙裏香花欲暮深

雙山過信公所居

唐 包 佶

遙禮前朝塔微聞後夜鐘
人間第四祖雲裏一雙峰
積雨封苔徑多年亞石松
傳心不傳法誰可繼高蹤

題雲際寺上方

唐

盧綸

松高蘿蔓輕中有石牀平
下界水常急上方燈自明
空門不易起初地本無程
迴步忽山盡萬緣從此生

春日陪李庶子遵善寺東院曉望

盧綸

映竹水田分當山起鴈羣
陽峰高對寺陰井下通雲雪

盡惟看鶴花時此見君由來禪誦地多有謝公文

慈恩寺暕上人房招耿拾遺

唐李端

悠然對惠遠共結故山期汲井樹陰下閉門亭午時地
閒花落厚石淺水流遲願與神仙客同來事本師

宿禪智寺上方演大師院

唐崔峒

石林高幾許金刹在中峰白日空山梵清霜後夜鐘竹
窗迴翠壁苔徑入寒松幸接無生法疑心怯所從

同韓員外宿雲門寺

唐嚴維

小嶺路雖近仙郎此夕過潭空觀月定澗靜見雲多竹
翠煙深色松聲雨點和萬緣俱不有對境自垂蘿

鄱陽大雲寺一公房

唐顧況

盡日陪遊處斜陽竹院清定中觀有漏言外證無生色
界聊傳法空門不用情欲知相去近鐘鼓兩聞聲

題招提寺

唐戎昱

招提精舍好石壁向江開山影水中盡鳥聲天上來一
燈傳歲月深院長莓苔日暮雙林磬玲玲送客回

遊瀑泉寺

唐
于鵠

日斜尋未遍古木寺高低粉壁猶遮嶺朱樓尚隔谿
窗通澗鼠殿脊立山雞更有無人處明朝獨向西

題山寺

唐
劉商

扁舟水綠綠曲岸復長塘古寺春山上登樓憶故鄉
雲煙橫極浦花木擁迴廊更有思歸意晴明陟上方

題橫山寺

唐
戴叔倫

偶入橫山寺湖山景最幽露涵松翠濕風湧浪花浮
老

衲供茶盃斜陽送客舟自緣歸思促不得更遲留

遊少林寺

戴叔倫

步入招提路因之訪道林石龕蒼蘚積香徑白雲深雙
樹含秋色孤峰起夕陰屨廊行欲徧回首一長吟

西郊蘭若

唐
羊士諤

雲天宜北戶塔廟似西方林下僧無事江清日正長石
泉盈掬冷山實滿枝香寂寞傳心印無言亦已忘

宿誠禪師山房題贈

唐
劉禹錫

晏坐白雲端清江直上看來人望金刹講席遶香壇虎
嘯夜林動鼉鳴秋澗寒衆音徒起滅心在定中觀

題潤州甘露寺

唐張祜

千重構橫險高步出塵埃日月光先見江山勢盡來冷
雲歸水石清露滴樓臺況是東溟上平生意一開

題萬道人禪房

張祜

何處鑿禪壁西南江上峰殘陽過遠水落葉滿疎鐘世
事靜中去道心塵外逢欲知情不動牀下虎畱蹤

杭州孤山寺

張祐

樓臺聳碧岑一境入湖心
不雨山長潤無雲水自陰
斷橋荒蘚澀空院落花深
猶憶西窗夜鐘聲出北林

題濠州鍾離寺

張祐

遙遙東郭寺數里占原田
遠岫碧光合長淮清派連
院藏歸鳥樹鐘到落帆船
唯羨空門叟棲心盡百年

姚巖懷賈島

唐
顧非熊

路向姚巖去多行洞壑間
鶴聲連隴靜谿色帶邨閒
疎

卷二十一
葦秋前渚斜陽雨外山憐君不得見詩思最相關

同盧校書遊新興寺

唐
朱慶餘

山深雲景別有寺亦堪過才子將迎遠林僧氣性和潭
清蒲影定松老鶴聲多豈不思公府其如野興何

與石畫秀才過普照寺

朱慶餘

問人知寺路松竹暗春山潭黑龍應在巢空鶴未還經
年爲客倦半日與僧閒更共嘗新茗聞鐘笑語間

宿山寺

唐
賈島

衆岫聳寒色精廬向此分
流星透疎木走月逆行雲
絕頂人來少高松鶴不羣
一僧年八十世事未曾聞

過靈泉寺

唐姚合

偶尋靈跡去幽徑入清氛
轉壑驚飛鳥穿山蹋亂雲
水從巖上落谿向寺前分
釋子遊何處空堂日漸曛

入靜隱寺途中作

唐周賀

亂雲迷遠寺入路認青松
鳥道緣巢影僧鞵印露蹤
草煙連野燒谿霧隔霜鐘
更遇樵人問猶言過數峰

山寺

唐杜牧

峭壁引行徑截谿開石門泉飛濺虛檻雲起漲前軒隔
水看來路疎籬見定猿未閒難久住歸去復何言

題揚州禪智寺

杜牧

雨過一蟬噪飄蕭松桂秋青苔滿階砌白鳥故遲畱暮
靄生深樹斜陽下小樓誰知竹西路歌吹是揚州

恩德寺

唐許渾

樓臺橫復重猶有半巖空蘿洞淺深水竹廊高下風晴

山疎雨後秋樹斷雲中未盡平生意孤帆又向東

送僧歸敬亭山寺

許渾

十年劒中路傳盡本師經曉月下黔峽秋風歸敬亭開
門新樹綠登閣舊山青遙想論禪處松陰水一瓶

鬱林寺

許渾

臺殿冠嵯峨春來日日過水分諸院少雲近上方多衆
籟凝絲竹繁英耀綺羅酒酣詩自逸乘月棹寒波

遊雲際寺

唐
喻鳧

澗壑吼風雷香門絕頂開閤寒僧不下鐘定虎常來鳥
啄林梢果鼯跳竹裏苔心源無一事塵界擬休回

題翠微寺

喻鳧

沿谿又涉嶺始喜到前軒鐘度鳥沉壑殿扃雲濕旂涼
泉墮衆石古木徹疎猿月上僧初定斯遊豈易言

岫禪師南谿蘭若

喻鳧

錫影配瓶光孤谿照草堂水懸青石磴鐘動白雲牀樹
色含殘雨河流帶夕陽唯應無月夜瞑目見他方

青龍寺僧院

唐 劉得仁

常多簪組客，非獨看高松。
此地堪終日，開門見數峰。
苔新禽跡少，泉冷樹陰重。
師意如山裏，空房曉暮鐘。

宿翠微寺

唐 馬戴

處處松陰滿樵間，一徑通鳥歸。
霜磬盡僧語，石樓空積翠。
含微月遙，泉韻細風經。
行心不厭憶，在故山中。

題靜住寺欽用上人房

馬戴

寺近朝天路，多聞玉珮音。
鑒人開慧眼，歸鳥息禪心。
磬

接星河曙窗連夏木深此中能燕坐何必在雲林

宿靈巖寺

唐趙嘏

明月谿頭寺蟲聲滿橘洲倚欄香徑晚移石太湖秋古
樹雲歸盡荒臺水更流無人見惆悵獨上最高樓

題造微禪師院

唐溫庭筠

夜香聞偈後岑寂掩雙扉照竹燈和雪看松月到衣草
堂疎磬斷江寺故人稀惟憶湘南雨春風獨鳥歸

宿輝公精舍

溫庭筠

禪房無外物清話此宵同
林彩水煙裏澗聲山月中
橡霜諸壑霽杉火一爐空
擁褐寒更徹心知覺路通

宿澧曲僧舍

溫庭筠

東郊和氣新芳靄遠如塵
客舍停疲馬僧牆畫故人
沃田桑景晚平野菜花春
更想嚴家瀨微風蕩白蘋

宿秦僧山齋

溫庭筠

衡巫路不通結室在東峰
歲晚得支遁夜寒逢戴顓
龕燈落葉寺山雪隔林鐘
行解無由發曹谿欲施春

和襲美初冬章上人院

唐
陸龜蒙

每伴來方丈還如到四禪
菊承荒砌露茶待遠山泉
畫古全無跡林寒却有煙
相看吟未竟金磬已泠然

遊竹林寺

唐
方干

得路到深寺幽虛曾識名
蘚濃陰砌古煙起暮香生
曙月落松翠石泉流梵聲
聞僧說真理煩惱自然輕

題慈雲寺僧院

唐
李山甫

帝城深處寺樓殿壓秋江
紅葉去寒樹碧峰來曉窗
煙

霞生淨土苔蘚上高幢欲問吾師語心猿不肯降

登甘露寺

唐周繇

盤江上幾層峭壁半垂藤殿鎖南朝像龕禪外國僧海
濤捲砌檻山雨灑窗燈日暮疎鐘起聲聲徹廣陵

題山僧院

唐張喬

谿路曾來日年多與舊同地寒松影裏僧老磬聲中遠
水清風落閒雲別院通心源若無礙何必更論空

題靈山寺

張喬

樹涼清島寺虛閣敞禪扉四面閒雲入中流獨鳥歸湖
平幽徑近船泊夜燈微一宿秋風裏煙波隔擣衣

宿澄泉蘭若

唐鄭谷

山半古招提空林雪月迷亂流分石上斜漢在松西雲
集寒菴宿猿先曉磬啼此心如了了即此是曹谿

題興善寺

鄭谷

寺在帝城陰清虛勝二林蘚侵隋畫暗茶助越甌深巢
鶴和鐘唳詩僧倚錫吟煙莎後池水前跡杳難尋

書翠巖寺壁

唐曹松

何年話尊宿瞻禮此堂中
入郭非無路歸林自學空
瓶雲嶠水逆磬雪川風時
說南廬事知師用意同

宿谿僧院

曹松

年少雲谿裏禪心夜更閒
煎茶畱靜者靠月坐蒼山
露白鐘尋定螢多戶未關
嵩陽有石室何日譯經還

冬日題覺公牛頭蘭若

唐李洞

天寒高木靜一磬隔川聞
鼎水看山汲臺香拂雪焚
鶴

歸惟認剎僧步不離雲石室開禪後輪珠謝聖君

宿山寺

唐張蠙

中峰半夜起忽覺在青冥此界自生雨上方猶有星樓
高鐘尚遠殿古像多靈好是潺湲水房房伴誦經

題岳州僧舍

唐裴說

喜到重湖北孤洲橫晚煙鷺銜魚入寺鴉接飯隨船松
檜君山迴菰蒲夢澤連與師吟論處秋水浸遙天

宿山寺

唐孟貫

谿山盡日行方聽遠鐘聲入院逢僧定登樓見月生
露垂羣木潤泉落一巖清此景關吾事通宵寐不成

甘露寺

唐孫魴

寒暄皆有景孤絕畫難形地拱千尋險天垂四面青
畫燈籠鴈塔夜磬徹漁汀最愛僧房好波光滿戶庭

宿山房

唐李建勳

石窗燈欲盡松檻月還明就枕渾無睡披衣却出行
巖高泉亂滴林動鳥時驚倏忽山鐘曙喧喧僕馬聲

題聖果寺

唐僧處默

路自中峰上盤迴出薜蘿到江吳地盡隔岸越山多古
木叢青靄遙天浸白波下方城郭近鐘磬雜笙歌

題簡然師院

唐僧貫休

機忘室亦空靜與沃洲同惟有半庭竹能生竟日風思
山海月上出定印香終繼後傳衣者還須立雪中

又和游光睦院

宋徐鉉

寺門山水際清淺照孱顏客棹晚維岸僧房猶掩關日

華穿竹靜雲影過階閒箕踞一長嘯忘懷物我間

題靈山寺

宋趙抃

我爲靈山好登畱到日曛巖幽餘暑雪鐘冷入秋雲篇
詠唯僧助塵煩與俗分明朝入東棹因得識吾文

題九仙寺

趙抃

陸果春三徑蒸雲晚一軒廊腰迴戰蟻山腹合啼猿泉
淡禽窺影苔深屐印痕自慚名利者聊免世紛喧

遊水南寺

宋余靖

雙刹聳浮雲層軒絕世塵松谿千蓋雨茶圃一旗春夜
梵龕燈暗朝香篆火新暫來猶永日堪羨白蓮人

題淨慧大師禪齋

宋

歐陽脩

巾屨諸方徧莓苔一室前
萎花吟次落孤月定中圓
齋鉢都人施談機海外傳
時應暮鐘響來度禁城煙

盱眙山寺

宋

林逋

下傍盱眙縣山崖露寺門
疎鐘過淮口一徑入雲根
竹老生虛籟池清見古源
高僧拂經榻茶話到黃昏

同宋復古遊大林寺

宋 周敦頤

三月山方煖，林花互照明。
路盤層頂上，人在半空行。
水色雲含白，禽聲谷應清。
天風拂巾袂，縹緲覺身輕。

崑山慧聚寺次張祐韻

宋 王安石

峰嶺互出沒，江湖相吐吞。
園林浮海角，臺殿擁山根。
百里見漁艇，萬家藏水邨。
地偏來客少，幽興祇桑門。

獨遊富陽普照寺

宋 蘇軾

富春真古邑，此寺亦唐餘。
鶴老依喬木，龍歸護賜書。
連

筒春水遠出谷曉鐘疎欲繼江潮韻何人爲起予

宿雪屏山寺

宋文同

翠嶺聳雲端巉巉走復蟠客從塵外入僧向畫中看月
上千巖碧風生萬木寒平明惜歸去猶待一憑欄

吉祥寺

文同

歌危一徑通下馬轉深叢便是塵寰外可憐煙隴中脩
篁寒滴雨老柏靜吟風日暮庭前樹歸鴉自遶空

金地寺

宋陳造

側徑崎嶇去飛蘿次第捫山橫欲無地路轉却逢邨竹
柏園荒寺莓苔上繚垣殘僧不知客芋火老雲根

化度寺

宋 孫覲

失路迷千嶂投休借一枝扣門竹西寺立馬日斜時矍
鑠僧窺戶睂眄犬透籬定知嫌不速明日與君辭

翠峰寺

宋 范成大

來從第九天橘社繫歸船借問翠峰路誰參雪竇禪應
真庭下木說法井中泉公案新翻出諸方一任傳

獨遊虎跑泉小菴

范成大

苔徑彎環入茅齋取次成
蔓花緣壁起閒草上階生
宿雨松篁色新晴燕雀聲
筒泉烹御米聊共老僧傾

慈雲院東閣小憩

宋陸游

橫閣院東偏
翛然拂榻眠
香濃煙穗直
茶嫩乳花圓
巖倚團團桂
筒分細細泉
憑誰爲題版
勝作小壺天

之永和小憩資壽寺

宋楊萬里

石子密鋪徑竹莖疎作行
不緣憩駟僕幾失此山房
佛

像看都好林花靜自香來須清興盡歸更借僧牀

龜峰寺

宋 趙師秀

石路入青蓮來遊出偶然峰高秋月射巖裂野煙穿螢
冷粘梭上僧閒坐井邊虛堂畱一宿宛似鴈山眠

翠巖寺

趙師秀

石巖看不見翠色自重重春雨生松葉山風響鐵鐘碑
頑工費墨草嫩鹿添茸住院吳僧老相迎憶舊逢

寶冠寺

宋 翁卷

山多猿鳥羣永日絕囂氛一澗水流出幾房僧共聞拄
筇黏落葉拂石動寒雲誰昔來營此尋碑看記文

石門菴

翁卷

山到極深處石門爲地名嵐蒸空寺壞雪壓小菴清果
落羣猿拾林昏獨虎行一僧何所得高坐若無情

福州黃檗寺

翁卷

天下兩黃檗此中山是真碑看前代刻僧值故鄉人一
宿禪房雨經時客路塵將行更瞻禮十二祖師身

宿寺

宋 徐照

古殿清燈冷虛廊葉掃風揜關人跡外得句佛香中鶴
睡應無夢僧談必悟空坐驚窗欲曉片月在林東

題衢州石壁寺

徐照

岸石橫生脈平林一里谿衆船寒渡集高寺遠山齊殘
磬吹風斷眠禽壓竹低自嫌昏黑至難認壁間題

能仁寺

徐照

寺置有碑傳觀音巖石前殿高燈燄短山合磬聲圓窗

靜吹寒雪春鳴落夜泉清遊人豈識謂不似秋天

宿寺

宋徐璣

古木山邊寺深松徑底風獨吟侵夜半清坐雜禪中殿
靜燈光小經殘磬韻空不知清遠夢啼鳥在林東

小寺

宋劉克莊

小寺無蹊徑行時認蘚痕犬寒鳴似豹僧老瘦于猿澗
水來旋磨山童出閉門城中梅未見已有數枝繁

夜過瑞香菴作

劉克莊

夜深捫絕頂童子旋開扉問客來何暮云僧去未歸山
空聞瀑瀉林黑見螢飛此境惟予愛他人到想稀

水陸寺

宋 戴復古

長沙沙上寺突兀古樓臺四面水光合一邊山影來靜
分僧榻坐晚趁釣船回明日重相約前邨訪早梅

遊青源

宋 文天祥

空庭橫蟠螭斷碣偃龍蛇活火參禪筍真泉透佛茶晚
鐘何處雨春水滿城花夜影燈前客江西七祖家

興福寺

宋 真山民

爲厭市喧雜攜詩來此吟鳥聲山路靜花影寺門深樓閣莊嚴界池塘清淨心松風亦好事送客出前林

宿寶勝寺

真山民

苦吟吟未了只向兩廊行月去塔無影風來鐸有聲塵心隨水淨佛眼共燈明安得雲邊住與僧分此情

高寺

金 張 斛

高寺鳴鐘後孤舟落鴈邊已知歸徑晚故就上方眠石

峻溜聲急月高松影圓明朝下煙靄迴首阻清川

甘露寺

金趙亮功

鄭南峰下寺泉石間疎篁飛雨度山閣閒雲生野塘簷
前松子落厨際柏煙香別後聞鐘磬山陰空夕陽

陪李舜咨登憫忠寺閣

金趙秉文

日月躔雙拱風煙納寸眸雲山浮近甸宇宙有高樓鳥
外餘殘照天邊更去舟登臨有如此況接李膺遊

宿海會寺

金李俊民

青山雲水窟杖錫幾時來竹待香嚴擊松經道者栽西
江無水吸震旦忽花開三笑圖中友同傾破戒杯

宿甘露寺

元
黃庚

山險疑無路縈迴一徑通鐘聲寒瀑外塔影夕陽中窗
出茶煙白爐分葑火紅禪房遇耆舊清話數宵同

翠峰菴即事

黃庚

竟日尋幽處杖藜不憚遙客行黃葉路僧立碧谿橋巖
瀑飛寒雪松風吼夜潮是山皆可隱何用楚辭招

游山寺

元李材

行行行復止行到白雲間見客意不俗逢僧心便閒細
泉分別澗小徑入他山擬借禪房榻追遊信宿還

宿龍潭寺

元薩都拉

倦遊借禪榻客意稍從容落日江船鼓孤燈野寺鐘竹
雞啼雨過山白帶雲春夜半波濤作長潭起卧龍

衡山福嚴寺二十三題

錄三

元張翥

一生巖

初地靈峰下重來爲講經神應合掌受石亦點頭聽雲
鶴隨飛盃湖龍入淨瓶至今花雨處長照一燈青

隱身巖

塵世苦熱惱山林長夏幽嶽神來護法尊者坐經秋呼
粥魚頻響銜花鹿自遊法雲長散滿七十二峰頭

兜率橋

傳是竺僧說幽如兜率宮驅龍劈地險架石補天空星
土熊湘合雲沙鷺嶺通闌干倚來久時度吉祥風

遊石頭城清涼寺用天錫題壁詩韻

張翥

捫蘿上絕頂嵐氣濕繽紛
日色不到地樹陰渾似雲
僧歸過嶺見樵唱逆風聞
更待詩人醉狂書白練裯

遊麻姑萬松菴

元貢師泰

積雨變秋思清遊愜道心
過橋分履迹問寺逐鐘音
紅墮鳥爭果綠深魚占陰
何當脫塵鞅重此契幽尋

聖安寺

元納新

蘭若城幽處聯鑣八月來寶華幢蓋合袈裟畫圖開斷
碣蒼苔暗空庭落葉堆飢鳶不避客攫食下生臺

大悲閣

納新

閣道連天起丹青飾井幹如何千手眼只著一衣冠金
榜交龍挾琬甍吻獸攢憑高天萬里白紵不勝寒

萬壽寺

納新

皇唐開寶構歷劫抵金時絕妙青松障清涼白玉池長
廊秋屨響高閣夜鐘遲獨有乘閒客扶藜讀舊碑

竹林寺

納新

城南天尺五，祇樹給孤園。
甲第王侯去，精藍帝釋尊。
老僧誇塔影，稚子斲松根。
何日天台路，相從一問源。

游崑山慧聚寺和唐人詩

元宋 聚

天外山光近，峰顛海氣吞。
潮憑風作陣，雲藉石爲根。
鳥重煙藏樹，帆多水繞邨。
凭高暫詩酒，回首望脩門。

吉祥寺

元吳 萊

一昔逢寒食，行吟採物華。
風生敲檻竹，雨濕墮船花。
曲

鴈青龍樹長灘白鷺沙回看江上水直去到吾家

來雲僧舍

元周權

連雲開佛屋接竹引巖泉路滑迷霜葉鐘寒閣曙煙有
爲皆是幻無想總成禪夢覺僧簷雨重來又十年

遊定林寺和韻

元陳泰

一燈何處起千載續黃梅世與身俱幻吾攜影獨來山
空鐘自響日淡鶴將回寄語沙頭鷺相逢慎勿猜

游洞嶺寺

元盧琦

古寺藏煙樹巖扉畫不扃日高花散影風定竹無聲稚
子添香火閒僧閱藏經新詩吟未就獨向殿階行

遊清心寺

元
曹文晦

夏日清心寺蕭蕭樹石佳高人畱別院幽意滿空齋松
偃新移路淵臨欲墮厓五年纔一過回首爲興懷

題應上人淨深精舍

元
葉顥

一室纖塵絕爐煙貝葉經每呼明月至常遣白雲扃竹
色侵虛幌荷香襲小亭晚來開甕牖放入數峰青

湖寺擁碧軒

元張雨

喧寂一塵隔湖濱出寶坊荷陰分補衲水氣雜燒香書
勘烏皮几茵敷白氎牀從來已公屋詩客許徜徉

嘉定顯慶寺

元僧善住

艤棹逢精舍松扉晝不扃暮雲兼雨黑寒樹帶煙青鳥
散庭還靜龍歸水自靈徘徊未能去石塔語風鈴

春日遊柏谷山寺

明朱珵堯

天外聞清梵晨光滿翠微杖藜蒼蘚滑斲藥紫參肥松

偃雲垂蓋花分露濕衣一僧能話古去住轉忘機

寓天界寺

明高啓

雨過帝城頭香凝佛界幽果園春乳雀花殿午鳴鳩萬
履隨鐘集千燈入鏡流禪居客旅迹不覺久淹留

甘露寺

高啓

勝地江山壯名林歲月遙剎藏京口樹鐘送海門潮月
黑龍光發天清蜃氣銷何當尋狼石閒坐話前朝

宿真慶菴

明唐肅

落日古城陰蕭蕭竹樹深
雨花知佛境流水識禪心
月到翻經榻苔緣掛壁琴
不因支許舊那得遂幽尋

宿雲門寺

明林鴻

龍宮臨水國鳥道入煙蘿
海曠知天盡山空見月多
鶴歸僧自老松偃客重過
便欲依禪寂塵纓可奈何

題深上人松月軒

明樓璉

夜月明松頂軒居不掩扉
石泉沈濕翠碧瓦弄晴暉
林靜猿初息巢空鶴未歸
此中凝坐者寒沁薜蘿衣

遊靈峰寺

明 樊 阜

步入靈峰寺嵐霏翠濕衣野塘蒲葉短石磴蘚花微潭
靜龍長卧山寒鶴未歸老僧茶話久高閣轉斜暉

遊黃龍寺

樊 阜

古寺青山上登臨見遠邨樓虛堆竹粉崖剝露松根晚
徑雲生潤秋池漲落痕高僧宣梵偈趺坐到黃昏

與陸無蹇宿資慶寺

明 蔡 羽

空壁聞啼鳥雲深冷石房春隨落花去人自採茶忙葉

暗翻經室泉虛點易牀陸郎谿壑主假榻久何妨

甘露寺次韻

明屠應埏

甘露千年寺羣公攬轡過樓空吳楚盡江濶雨雲多蜃
氣連滄海琳宮隱碧蘿更聞幽絕處白日走鼃鼃

冬日遊天竺寺

明施漸

緣湖始忻往遐覽歷幽尋山到不容路雲藏猶有林階
前寒澗落榻下白雲深積雪千峰裏寥然空世心

遊報恩寺

明徐鱗

荒畛通雲岫，煙蘿敞紺扉。
畫梁雲氣盡，網戶雨絲飛。
僧寂鳴鐘罷，林荒宿鳥歸。
一燈仍自照，惆悵戀殘暉。

避暑東湖寺

徐 鱗

物外尋真境，雲標啓梵宮。
綠沈消夏氣，紅艷奪春工。
嶺色含朝旭，巖聲亂夕空。
坐來林月上，涼思滿房櫳。

題峴山濟公房

明 蔡汝楠

禪榻澄湖上，山光似鏡中。
疎鐘搖落葉，細雨帶秋蟲。
峰竹虛窗映，爐香別院通。
何期碧雲合，一酌對休公。

橘谿僧院

明

吳子孝

蟬聲不出寺鐘斷祇聞香流水
迷松徑閒雲滿石牀無
言忘寂寞宴坐得清涼
欲謝人間事冥心叩藥王

過南郭野寺

明

施峻

休沐出南郭尋僧一扣關
孤燈燃白晝疎磬滿秋山
東帶經年苦看雲盡日閒
齋厨清供罷驚鷓欲飛還

宿鴈山靈巖寺

明

皇甫洵

寥寥到真境宿處傍風泉
遙靄引疎磬羣峰寒暮天
白

雲滄洲賞清夜石門禪却笑桃源客空從蕙路旋

遊能仁寺

明金大車

落葉迷幽徑垂藤鎖斷垣谿深晴浴鷺樹老晝啼猿海
氣庭前障天花雨外翻坐來清梵永盡日不聞喧

沂水道中過教寺

明金大輿

邨落藏孤寺疎松一徑幽經年無客到終日有寒流青
壁銜初照黃沙擁斷丘平生江海性下馬一登樓

半塘寺一上人小樓

明居節

何處聞清磬春雲度半塘茶香連小院樓影帶脩廊不
染蓮花淨閒貪佛日長晚山如有意飛翠滿繩牀

雨後登虎丘宿梅花樓僧房

明陸弼

高閣藤蘿外扁舟暮雨殘鐘聲知客到山色入門看月
出千松靜雲披片石寒支公擅名理終夕奉清歡

泊京口望金山寺

明陳鶴

南徐一片石千古柱中流繞樹開僧舍緣空結梵樓疎
燈明水底落月挂潮頭向晚禪鐘起風吹到客舟

佛慧寺

明 吳孺子

亂竹閉僧院長松護法堂坐憐新月上行愛落花香破
壁流燈影懸厓挂夕陽支公閒懶處暫此禮空王

蘭若即事

明 王伯稠

興來時野眺小立倚柴扉一雨清波動雙林片月歸山
龕藏竹語水鳥出花飛不覺空煙暮濛濛翠濕衣

大慧寺

明 童珮

寺裏藏雲氣丹青引客過春山一牆隔啼鳥六時多列

石成巖穴閉門生薜蘿
逃禪恰宜此歸奈馬蹄何

破山寺

明
吳鼎芳

巉岈隨石轉迤邐踏花行
古壁龍蛇氣空巖風雨聲
佛香清渡水鳥路白過城
絕頂遙觀海蒼茫曉霧生

虎丘僧房招尋郭聖僕乘月登山

吳鼎芳

長隄沿短棹轉入翠微灣
酒伴秋相集僧房夜不關
布袍先受月竹杖早過山
何處歌聲起悠悠林木間

寓建陽福山寺

明徐燂

磴路層層入招提夾兩山柏侵陰殿綠苔繡古牆斑細
雨蟲聲碎微風蝶影閒五更鐘韻杳鄉夢屢催還

吳門歸入惠山寺

明鄒迪光

勝遊不惜屢餘興尚淋漓竹路青相借花宮翠亂披酒
闌畱月住曲半受風吹爲問梁谿夜何如吳苑時

晚過新興寺

明張宇初

晚過新興寺扶藜野步輕鳥啼春雨足花落午風晴僧

室連雲住山阿帶霧行武陵歸路近已聽澗松聲

秋日重遊穹窿山海雲精舍

明

僧道衍

迢遞青邨外崎嶇紫邏間過林才見日到渡不逢山一
室依巖險雙扉傍竹間曾看雲際鶴向暮獨飛還

題海雲寺

明

僧德祥

香刹住中流初疑地若浮路從沙際入帆到樹邊收清
磬敲漁夜新書報橘秋洞庭西在望欲去更遲留

同菴新居

僧德祥

新居勞種植隙地不教閒作圃先通水栽松欲借山鳥
逢春盡到雲向晚都還獨許王摩詰題詩在壁間

宿甘露菴

明僧海旭

舟出太湖險語豁投暮鐘聽風多在竹看月不離松柝
護城三里雞鳴邨一重長安明日路霜草滑歸節

題指月菴

明僧照源

短扉將綠掩小徑倚邨斜老樹借藤葉新桐布屋花漁
歌傳外港鷗夢立前沙靜者離言象門題指月家

水寺

明僧際瞻

孤寺水中起淨心
宛在虛鐘邊雲易濕
松外地無餘幢影
魚窺熟梵音風定
初入秋看月上清
切復何如

五言排律

謁并州興國寺

唐太宗

廻鑾遊福地極目玩芳晨
梵鐘交二響法日轉雙輪
寶刹遙承露天花近足
春未佩蘭猶小無絲柳
尚新圓光低月殿碎影
亂風筠對此畱餘想超
然離俗塵

奉和幸大薦福寺應制

唐
李嶠

鴈沼開香域，鸚鵡林降彩旒。
還窺圖鳳宇，更坐濯龍川。
桂輦朝羣辟，蘭宮列四禪。
半空銀閣斷，分砌寶繩連。
甘雨蘇焦澤，慈雲動沛篇。
獨慙賢作礪，空喜福成田。

奉和幸三會寺應制

李嶠

故臺蒼頡里，新邑紫泉居。
歲在開金寺，時來降玉輿。
龍形雖起剎，鳥跡尚畱書。
竹是蒸青外，池仍點墨餘。
天文光聖草，寶思合真如。
謬奉千齡日，欣陪十地初。

奉和幸三會寺應制

唐 宋之問

六飛迴玉輦雙樹謁金仙
瑞鳥呈書字神龍吐浴泉
淨心遙證果睿想獨超禪
塔湧香花地山圍日月天
梵音迎漏徹空樂倚雲懸
今日登仁壽長看法鏡圓

遊稱心寺

宋之問

釋事懷三隱清襟謁四禪
江鳴潮未落林曉日初懸
寶葉交香雨金沙吐細泉
望詣舟客趣思發海人煙
顧檻仍畱馬乘杯久棄船
未憂龜負岳且識鳥耘田
理契都

無象心冥不寄筌
安期庶可揖天地得齊年

靈隱寺

宋之問

鷲嶺鬱嵒堯龍宮鎖寂寥樓觀滄海日門對浙江潮
桂子月中落天香雲外飄
捫蘿登塔遠剝木取泉遙
霜薄花更發冰輕葉未凋
夙齡尚遐異搜對滌煩囂
待入天台路看余度石橋

遊法華寺

宋之問

高岫擬耆闍真乘引妙車
空中結樓殿意表出雲霞
後

果纏三足前因感六牙宴林薰寶樹水溜滴金沙寒谷
梅猶淺溫庭橘未華臺香紅藥亂塔影綠篁遮果漸輪
王族緣超梵帝家晨行踏忍草夜誦得靈花江郡將何
匹天都亦未加朝來沿泛所應是逐仙槎

遊化感寺

唐

王維

翡翠香煙合琉璃寶地平龍宮連棟宇虎穴傍簷楹谷
靜惟松響山深無鳥聲瓊峰當戶折金澗透林明郢路
雲端迴秦川雨外晴鴈王銜果獻鹿女踏花行抖擻辭

貧里歸依宿化城，繞廬生野蕨。空館發山櫻，香飯青菰米。
嘉蔬紫芋羹，誓陪清梵末。端坐學無生。

投道一師蘭若宿

王維

一公棲太白，高頂出雲煙。梵流諸壑徧，花雨一峰偏。
迹爲無心隱，名因立教傳。鳥來還語法，客去更安禪。
晝涉松路盡，暮投蘭若邊。洞房隱深竹，清夜聞遙泉。
向是雲霞裏，今成枕席前。豈惟暫畱宿，服事將窮年。

青龍寺曇壁上人兄院集

王維

高處敞招提，虛空詎有倪。
坐看南陌騎，下聽秦城雞。
眇眇孤煙起，芊芊遠樹齊。
青山萬井外，落日五陵西。
眼界今無染，心空安可迷。

春日歸山寄孟六浩然

唐李 白

朱紱遺塵境，青山謁梵筵。
金繩開覺路，寶筏渡迷川。
嶺樹攢飛栱，巖花覆谷泉。
塔形標海月，樓勢出江煙。
香氣三天下，鐘聲萬壑連。
荷秋珠已滿，松密蓋初圓。
鳥聚疑聞法，龍參若護禪。
媿非流水韻，叨入伯牙絃。

同諸公遊雲公禪寺

唐張謂

共許尋雞足誰能惜馬蹄
長空淨雲雨斜日半虹霓
簷下千峰轉窗前萬木低
看花尋徑遠聽鳥入林迷
地與喧卑隔人將物我齊
不知樵客意何事武陵谿

遊棲霞寺同沈拾遺宿康上人房

唐權德輿

偶來人境外心賞幸隨君
古殿煙霞夕深山蘭桂熏
巖花點寒溜石磴掃春雲
清梵諸天近誼塵下界分
名僧

康寶月上客沈休文共宿東林下清猿徹曙聞

題甘露寺

唐許棠

丹檻拂丹霄人寰下瞰遙何年增造化萬古出塵囂地
勢盤三楚江聲換幾朝滿欄皆異藥到頂盡飛橋澤廣
方雲夢山孤數沃焦中宵霞始散經臘木稀凋鐸動天
風度窻鳴海氣消帶輦分迴堞當日辨翻潮鳥去沈葭
莢帆來映沔瀟浮生自多事無計免迴鑣

題甘露寺

唐楊夔

高殿拂雲霓登臨想虎谿風勻帆影衆煙亂鳥行迷北
倚波濤闊南窺井邑低滿城塵漠漠隔岸草萋萋虛閣
延秋磬澄江響暮輦客心還惜去新月挂樓西

法海寺

明吳兆

野航時可繫林寺晝猶扃古木無年歲清陰滿戶庭客
來方禮磬僧坐但翻經煙起吹茶竈聲聞汲井瓶窗過
湖鳥白簷挂葉蟲青蔬飯欣然飽徐徐步遠坰

七言律

從幸香山寺應制

唐 沈佺期

南山奕奕通丹禁，北闕峩峩連翠雲。
嶺上樓臺千地起，城中鐘鼓四天聞。
旃檀曉閣金輿度，鸚鵡晴林綵仗分。
願以醍醐參聖酒，還將祇苑當秋汾。

紅樓院應制

沈佺期

紅樓疑見白毫光，寺逼宸居福盛唐。
支遁愛山情漫切，曇摩泛海路空長。
經聲夜息聞天語，爐氣晨飄接御香。
誰謂此中難可到，自憐深院得徊翔。

澠湖山寺

唐
張說

空山寂歷道心生
虛谷迢遙野鳥聲
禪室從來塵外賞
香臺豈是世中情
雲間東嶺千重出
樹裏南湖一片明
若使巢由同此意
不將蘿薜易簪纓

過乘如禪師蕭居士嵩丘蘭若

唐
王維

無著天親弟與兄
嵩丘蘭若一峰晴
食隨鳴磬巢鳥下
行蹋空林落葉聲
迸水定侵香案濕
雨花應共石牀平

深洞長松何所有儼然天竺古先生

涪城縣香積寺官閣

唐
杜甫

寺下春江深不流山腰官閣迴添愁含風翠壁孤雲細
背日丹楓萬木稠小院迴廊春寂寂浴鳬飛鷺晚悠悠
諸天合在藤蘿外昏黑應須到上頭

夜宿靈臺寺寄郎士元

唐
錢起

西日橫山含碧空東方吐月滿禪宮朝瞻雙頂青冥上
夜宿諸天色界中石潭倒沍蓮花水塔院空聞松柏風

萬里故人能尚爾知君視聽我心同

題精舍寺

唐
郎士元

石林精舍武谿東夜叩禪扉謁遠公月在上方諸品靜
心持半偈萬緣空蒼苔古道行應徧落木寒泉聽不窮
更憶雙峰最高頂此心期與故人同

題雲際寺準上人房

唐
李端

高僧居處似天台錫杖銅瓶對綠苔竹巷雨晴春鳥囀
山房日午老人來園中鹿過椒枝動潭底龍游水沫開

獨夜焚香禮遺像空林月出始應迴

題凌雲寺

唐司空曙

春山古寺繞滄波石磴盤空鳥道過百丈金身開翠壁
萬龕燈燄隔煙蘿雲生客到侵衣濕花落僧禪覆地多
不與方袍同結社下歸塵世竟如何

春題龍門香山寺

唐武元衡

衆香天上梵仙宮鐘磬寥寥半碧空乍開松嶺月
亂流長響石樓風山河杳映春雲外城闕參差茂樹中

欲盡出尋那可得三千世界本無窮

題柱國寺

唐王建

皇帝施錢脩此院半居天上半人間
丹梯暗出三重閣古像斜開一面山
松柏自穿空地少川原不稅小僧閒
行香天使長相續早起離城日午還

送王十八歸山寄題仙遊寺

唐白居易

曾於太白峰前住數到仙遊寺裏來
黑水澄時潭底出白雲破處洞門開
林間煖酒燒紅葉石上題詩掃綠苔

惆悵舊遊無復到菊花時節羨君迴

寒林寺

唐李紳

最深城郭在人煙疑借壺中到梵天巖樹桂花開月殿
石樓風鐸繞金仙地無塵染多靈草室鑒真空有定泉
應是法宮傳覺路使無煩惱見青蓮

杭州天竺靈隱二寺

李紳

翠巖幽谷高低寺十里松風碧嶂連開盡春花芳草澗
徧通秋水月明泉石文照日分霞壁竹影侵雲拂暮煙

時有猿猱擾鐘磬老僧無復得安禪

其二

人煙不隔江城近水石雖清海氣深波動只觀羅刹相
靜居難識梵王心魚扃畫鎖龍宮寶鴈塔高摩慾界金
近日猶聞重雕飾世人遙禮二檀林

早秋寄題天竺靈隱寺

唐賈島

峰前峰後寺新秋絕頂高窻見沃洲人在定中聞蟋蟀
鶴曾棲處挂獼猴山鐘夜度空江水汀月寒生古石樓

心憶懸帆身未遂
謝公此地昔年遊

宿長慶寺

唐杜牧

南行步步遠浮塵
更近青山昨夜鄰
高鐸數聲秋撼玉
霽河千里曉橫銀
紅蕖影落前池淨
綠稻香來野徑頻
終日官閒無一事
不妨長醉是遊人

寄題甘露寺北軒

杜牧

曾向蓬萊宮裏行
北軒欄檻最畱情
孤高堪弄桓伊笛
縹緲宜聞子晉笙
天接海門秋水色
煙籠隋苑暮鐘聲

他年會著荷衣去不向山僧道姓名

題靈山寺行堅師院

唐許渾

西巖一徑不通樵八十持杯未覺遙
龍卧石潭聞夜雨鴈移沙渚見秋潮
經函露濕文多暗香印風吹字半銷
應笑東歸又南去越山無路水迢迢

題廬山寺

唐馬戴

白茅爲屋宇編荆數處階墀石疊成
東谷笑言西谷響下方雲雨上方晴
鼠驚樵客緣蒼壁猿戲山頭撼紫檉

別有一條投澗水竹筒斜引入茶鑪

宿山寺

唐 項斯

栗葉重重覆翠微
昏谿上語人稀
月明古寺客初到
風度閒門僧未歸
山果經霜多自落
水螢穿竹不停飛
中宵能得幾時睡
又被鐘聲催著衣

題西明寺禪院

唐 溫庭筠

曾識匡山遠法師
低松片石對前墀
爲尋名畫來過院
因訪閒人得看棋
新鴈參差雲碧處
寒鴉繚繞葉紅時

自知終有張華識不向滄洲理釣絲

宿松門寺

溫庭筠

白石青厓世界分卷簾孤坐對氤氲林間禪室春深雪
潭上龍堂夜半雲落月蒼涼登閣在曉鐘搖蕩隔江聞
西州舊是經行地願漱寒瓶逐領軍

和趙嘏題岳寺

溫庭筠

疎鐘細響亂鳴泉客省高臨水似天嵐翠暗來空覺潤
澗茶餘爽不成眠越僧寒立孤燈外岳月秋當萬木前

張邴官情何太薄
遠公窗外有池蓮

宿雲際寺

溫庭筠

白蓋微雲一徑深
東風弟子遠相尋
蒼苔路熟僧歸寺
紅葉聲乾鹿在林
高閣清香生靜境
夜堂疎磬發禪心
自從紫桂巖前別
不見南能直至今

雨後遊南門寺

唐
劉滄

郭南山寺雨初晴
上界尋僧竹裏行
半壁樓臺秋月過
一川煙水夕陽平
苔封石室含潤露
滴松枝鶴有聲

木葉蕭蕭動歸思西風畫角漢東城

題應天寺上方兼呈謙上人

唐

方干

中天坐卧見人寰峭石垂藤不易攀晴卷風雷歸故壑
夜和猿鳥鎖寒山勢橫綠野蒼茫外影落平湖潋灩間
師在西巖最高處路尋之字見禪關

題宣州延慶寺益公院

唐

楊夔

默坐能除萬種情臘高兼有賜衣榮講經舊說傾朝聽
登殿曾聞降輦迎幽徑北連千嶂碧虛窗東望一川平

長年門外無塵客時見元戎駐旆旌

少華甘露寺

唐鄭谷

石門蘿徑與天鄰雨檜風篁遠近聞
飲澗鹿喧雙派水上樓僧蹋一梯雲
孤煙薄暮關城沒遠色初晴渭曲分
長欲然燈來此宿北林猿鶴舊同羣

遊西禪

唐伍喬

遠岫當軒列翠光高僧一衲萬緣忘
碧松影裏地長潤白藕花中水亦香
雲自雨前生淨石鶴於鐘後宿塵廊

遊人戀此吟終日
盛暑樓臺早有涼

駕幸普濟寺應制

唐僧廣宣

南方寶界幾由旬
八部同瞻一佛身
寺壓山河天宇靜
樓懸日月鏡光新
重城柳暗東風煖
複道花明上苑春
向晚鸞輿歸鳳闕
曲江池上動青蘋

題棲霞寺僧房

唐僧處默

名山不取買山錢
任構花宮近碧巔
松檜老依雲裏寺
樓臺深鎖洞中天
風經險嶂回疎雨
石倚危屏挂落泉

欲結茅菴共師住肯饒多少薜蘿煙

遊虎丘山寺

宋王禹偁

寺牆圍著碧孱顏曾是當年海湧山盡把好峰藏院裏
不教幽景落人間劍池草色經冬在石座苔花自古斑
珍重晉朝吾祖地一迴來此便忘還

登甘露寺北望

宋徐鉉

京口潮來曲岸平海門風起浪花生人行沙上見日影
舟過江中聞櫓聲芳草遠迷揚子渡宿煙深暎廣陵城

游人鄉思應如橘相望須含兩地情

登廣教院閣

宋韓琦

岑寂禪扉啓畫闌公餘爲會一開顏
高臺面壘包平野老栢參天礙遠山
花去春叢蝴蝶亂雨勻朝圃桔槔閒
徘徊軒檻何時下直待前枝倦鵲還

同萬州相里殿丞遊谿西山寺

宋趙抃

使君呼客入山行曉徑前驅照彩旌
蠻女背樵巖側避

野僧攜刺馬頭迎，千層雲水迷三峽。
一闌人煙認百城，樓閣憑餘清我聽。
竹風蕭瑟澗泉鳴。

孤山寺端上人房寫望

宋林逋

底處憑闌思渺然，孤山塔後閣西偏。
陰沈畫軸林間寺，零落棊枰葑上田。
秋景有時飛獨鳥，夕陽無事起寒煙。
遲留更愛吾廬近，祇待重來看雪天。

孤山寺

林逋

雲峰水樹南朝寺，祇隔叢篁作並鄰。
破殿靜披塵白古。

齋房閒試酪奴春
白公睡閣幽如畫
張祜詩牌妙入神
乘興醉來拖木突
翠苔蒼蘚石磷磷

易從上人山亭

林逋

湖上汪灣隔數峰
籬門和竹夾西東
閒來此地行無厭
又共吾廬看不同
靈隱路歸秋色裏
招賢菴在鳥行中
屏風若欲相攬見
合把巉巖與畫工

次韻吳季野題岳上人澄心亭

宋

王安石

高亭五月尚寒生回首塵沙自鬱蒸砌水亂流穿石底
檻雲高出蔽山層躋攀欲絕人間世締構知從物外僧
腸胃坐來清似洗神奇未怪佛圖澄

寄題華藏院清軒

宋

蔡襄

湖邊無地有塵埃況復虛明向北開山色每隨朝氣變
水光長共夕陽來船行天上遊人散樹沒雲中宿鳥迴
一到便應離火宅不須花雨拂金臺

是日宿水陸寺寄北山清順僧

宋 蘇軾

長嫌鐘鼓聒湖山，此境蕭條却自然。
乞食遶邨真爲飽，無言對客本非禪。
披榛覓路衝泥入，洗足關門聽雨眠。
遙想後身窮賈島，夜寒應聳作詩肩。

畱題顯聖寺

蘇軾

渺渺疎林集晚鴉，孤邨煙火梵王家。
幽人自種千頭橘，遠客來尋百結花。
浮石已乾霜後水，焦坑閒試雨前茶。
祇疑歸夢西南去，翠竹江邨遶白沙。

閒居院上方晚景

宋文同

繞巖紫谷到禪扃，更上危顛最上亭。
風攪亂鴉盤古木，雨催羣鷺下寒汀。
秋田溝壠如碁局，晚岫峰巒若畫屏。
詩已就成終夕去，遠邨燈火一青青。

甘露寺

宋米芾

六代蕭蕭木葉稀，樓高北固落殘暉。
兩州城郭青煙起，千里江山白鷺飛。
海近雲濤驚夜夢，天低月露濕秋衣。
使君肯負時平樂，長倒金鍾盡醉歸。

山光寺

米芾

竹園山徑晚風清又入山光寺裏行一一過僧談舊事
遲遲繞壁認題名仙來石畔懷灰劫鶴語池邊勸後生
三十年間成底事空叨閒祿是身榮

題落星寺

宋黃庭堅

落星開士深結屋龍閣老翁來賦詩小雨藏山客坐久
長江接天帆到遲宴寢清香與世隔畫圖妙絕無人知
蜂房各自開戶牖處處煮茶藤一枝

石壁寺

宋 沈與求

山縈細路走脩蛇，峭壁連雲只薜蘿。
木末忽看旛影亂，馬頭初見殿陰斜。
迴廊迤迤穿危嶠，側澗涓涓露淺沙。
秀色可餐吾事辦，粥魚茶板莫相夸。

宿柳子觀音寺

宋 張耒

黃塵滿道客衣穿，古寺荒涼暫息肩。
倦體卧來便穩榻，汗顏濯去快寒泉。
野僧治飯挑蔬至，童子攜茶對客煎。
夜久月高風鐸響，木魚呼覺五更眠。

靈泉寺

宋 孫覲

窗戶遙開紫翠間，小橋獨立聽潺潺。
意諧獨有清風共，興盡聊隨落照還。
但見虛童蒙白帔，且無瀧吏發駢顙。
風花雨葉元無定，何必區區戀故山。

南山寺

孫覲

千丈雲根蔭此邦，沈沈寒影卧秋江。
潭空映日蒼虬動，煙煖翹沙白鷺雙。
夢覺灘聲喧客枕，吟餘竹色滿僧窗。
詩成絕叫曾樓上，聽我洪鐘萬石撞。

山人方丈

宋朱子

方丈翛然屋數椽
檻前流水自清漣
蒲團竹几通宵坐
掃地焚香白晝眠
地窄不容揮麈客
室空那有散花天
箇中有句無人薦
不是諸方五味禪

桐廬舟中見山寺

朱子

一山雲水擁禪居
萬里江流遶屋除
行色匆匆吾正爾
春風處處子何如
江湖此去隨漚鳥
粥飯何時共木魚
孤塔向人如有意
他年來借一蘆簰

遊脩覺寺

宋 陸 游

上盡蒼崖百尺梯，詩囊香碗手親攜。
山從飛鳥行邊出，天向平蕪盡處低。
花落忽驚春事晚，樓高剩覺客魂迷。
興闌掃榻禪房卧，清夢還應到剡谿。

六月十四日宿東林寺

陸 游

看盡江湖千萬峰，不嫌雲夢芥吾胸。
戲招西塞山前月，來聽東林寺裏鐘。
遠客豈知今再到，老僧能記昔相逢。
虛窗熟睡誰驚覺，野碓無人夜自舂。

過湖上僧房

陸游

西菴每過未嘗開邂逅清言始此回
陶令巾車尋壑去
已公茅屋賦詩來
奇香炷罷雲生岫
瑞茗烹成乳泛杯
便恐從今往還熟
入門猿鶴不驚猜

萬年寺

宋趙師秀

萬年山木有千年
石路陰深到繚垣
幾片閒雲誰是主
一條流水不知源
土栽芍藥尤勝木
僧說獼猴極畏猿
夜半空堂諸境寂
微聞鐘梵亦成喧

覺慈寺

宋 戴復古

踏破白雲登上方，自嫌塵土浣禪牀。
千山月色令人醉，半夜梅花入夢香。
深谷不妨春到早，老僧殊爲客來忙。
山童嬾慣勞呼喚，自拗枯松煮朮湯。

訪僧鄰菴

宋 林景熙

拂石題詩滿袖嵐，尋僧又過竹谿南。
乾坤浩蕩酒鄉寄，山水蒼寒琴意參。
老燕未歸同是客，孤雲無住孰爲菴。
寂寥午夜松風響，疑是神仙接麈談。

三峰寺

宋 真山民

寂寞煙林噪亂鴉青鞵步入野僧家雲深不礙鐘聲出
日轉還依塔影斜廊下蝸粘沿砌蘚佛前蜂戀挿瓶花
竹牀紙帳清如水一枕松風聽煮茶

宿南峰寺

真山民

禪房花木鎖深幽借與詩人信宿畱檐影分來半廊月
磬聲敲破一林秋僧偏好事能青眼佛本無心亦白頭
試問青松峰外鶴閒邊曾見幾人遊

遊鳳棲寺

真山民

十載重遊古鳳棲
蓮宮新繞綠楊隄
欲談世事佛無語
不管客愁禽自啼
苔滑空廊方散步
塵昏老壁失畱題
僧家山地鄰家種
菜甲春生綠滿畦

次韻孫傳師龍圖游醴泉寺

宋僧道潛

楊林幾曲到城根
中有招提氣象昏
暝雀聚羣盤棟吻
老藤垂蔓覆高垣
月生歸路無燈火
巷轉人家有笑言
却掩吾廬還寂寞
冷風搖幔影翩翻

題天王圓證大師房壁

宋僧惠洪

閉戶不妨依聚落
開軒隨分有山林
殘經半掩世情斷
好鳥一聲邨意深
籬外霜筠森束玉
屋頭露橘欲垂金
能營野飯羹紅醬
渡水何辭數訪尋

寒食再遊福田寺

金元德明

春山寂寂掩禪扉
複嶺盤盤入翠微
布襪青鞵供勝踐
粥魚齋鼓薦靈機
日烘幽徑綠煙煖
風定曉枝紅雨稀
曾是西堂讀書客
不應啼鳥也催歸

登綿山上方

金周昂

環合青峰插劒長，山平如掌寄禪房。
危欄半出雲霄上，秘景盡收天地藏。
野闊羣山驚破碎，雲低滄海認微茫。
九華籍甚因人顯，迥秀可憐天一方。

登淨江寺松風閣

元尹廷高

巋然傑閣倚松岡，縱使無風也自涼。
四面闌干金碧界，萬家城郭水雲鄉。
清江疊嶂迷空闊，白鳥蒼煙墮渺茫。
風景不殊君記否，吳山頂上看錢塘。

宿中山乾明寺

元 劉秉忠

客散關門厭事譁
鑪香滿屋卧煙霞
人辭故里凡三載
僧到伽藍自一家
夢破小窗浮月色
漏殘寒角奏梅花
天明又上潯陽道
鴛水歸程漸有涯

游智者寺

元 鮮于樞

四圍松是祇園樹
三面山開舍衛城
游子心隨仙境化
老禪詩似石泉清
幾人解后有今日
半載超超成此行
安得盡拋身外事
長年來此學無生

題圓覺天台教寺

元
鄧文原

大圓覺境清涼地要闡毘盧貝藏開飛錫不妨隨鶴下
蟠桃曾見有龍來相逢定性三生路盡了塵心萬劫灰
憶我初年慕蟬蛻石橋煙雨過天台

三月晦遊道場山宿清公房

鄧文原

絕頂軒窗納晚晡下方燈火聽鐘魚天連震澤涵元氣
地湧浮圖切太虛涼立松風觀石溜晚尋樵徑扣僧廬
孤亭山麓荒苔積猶想幽人夜讀書

棲真院

元于石

空翠凝寒不受埃，斷崖千尺擁崔嵬。
老僧倚樹驚猿去，童子掃階知客來。
石徑晴因松露濕，茶煙遠趁竹風迴。
禪家也辨吟邊料，不種閒花只種梅。

次韻張蔡國公淡菴青山寺詩

元虞集

相國觀山負夙期，聖恩祇許暫相違。
身隨雲影畱三宿，心了泉聲絕百非。
開士談空依寶樹，野人耕雨薦山薇。

雙龍深護安禪處繞坐諸天近紫微

題半山寺

元薩都拉

今日偶成林壑趣清幽恨未得從容龍歸石洞半山雨
潮卷天風十里松春路泥深多滑馬晚樓霧重只聞鐘
荆公舊隱知何處回首蒼茫第幾重

遊天竺寺

元張翥

石梁濺水濕蒼苔陰洞旁穿澗底回殿閣金銀從地湧
山林圖畫自天開龍隨僧到分雲住猿聽人呼下樹來

遊興未闌斜日盡馬頭呼酒自徘徊

建德城西寺

元貢師泰

山門東轉步廊深長日禪房占綠陰松徑雨晴添虎跡
竹潭風冷聽龍吟上林久說相如賦故里徒誇季子金
獨坐胡牀看明月不知涼露濕衣襟

東岡崇恩寺晚酌其僧一峰求詩

元宋 褰

山門杉檜碧蕭森步屨迴廊一徑深罷酒長風來北渚

按歌明月出東林幽軒晚立雲容濕高閣晴登海氣侵
忽報寒溝潮信到可能重聽穎師琴

寓奉化寺寄菩提寺主

元 丁鶴年

菩提嶺外空王寺丹磴行穿虎豹羣萬壑濤聲巖下瀑
千峰雨氣屋頭雲海龍送水金瓶貯天女懷香寶鼎焚
慙愧無緣塵土客朝朝鐘鼓下方聞

遊南峰寺有支遁放鶴亭

明 高 啓

每向人間望碧峰石門今得問幽蹤路緣風磴泠泠策

寺隔煙蘿杳杳鐘窗下鳥來多墮果亭前鶴去只高松
一龕願借依香火莫道詩人非戴顓

過僧舍訪呂敏

高啓

幾欲相尋與願違今朝始得過禪扉
磬聲穿竹山房遠屐齒粘苔石徑微
幽鳥每同馴鴿下高人閒與老僧依
談詩說偈俱堪喜坐覺茶香上薜衣

孤園寺

在洞庭山梁散騎
常侍吳猛古宅

高啓

欲問南朝常侍宅已爲西域化人宮
山僧歸帶漁舟雨

湖鳥來聞粥鼓風橘柚垂簷秋殿暗波濤驚坐夜堂空
給孤長者誰曾見應在煙雲杳靄中

秋日登戴山佛閣

明張羽

風物澄明宿靄收登山欲盡更登樓一行白鴈投南下
百道清谿向北流野嶂雲歸初歇雨湖田稼熟始知秋
空門寂寂無塵事騁望端能散客愁

登太華寺

明張統

太華嵯峨一望遙到門猶礙過谿橋蔥雲長見階前起

孽火都來海上消，屋近樹陰晴亦暗。
硯涵竹露夜還潮，從今剝買遊山屐。
野客無妨屢見招。

金山寺

明趙文

水天樓閣影重重，化國何年此寄蹤。
淮海西來三百里，大江中湧一孤峰。
濤聲夜恐巢枝鳥，雲氣朝隨出洞龍。
幾度欲登帆去疾，蒼茫遙聽隔煙鐘。

送辰長老住橫山寺

明鄭嘉

紫檀煙凝鶴迴翔，清磬泠泠出上方。
巖畔異花熏講席，

澗邊脩竹護禪房東林結社蓮初種南岳分春茗乍香
三伏炎蒸應不到綠蘿風灑石龕涼

化城寺

明 王守仁

化城高處萬山深樓閣憑空上界侵天上清秋度明月
人間微雨結輕陰鉢龍浮處雲生座巖虎歸時風滿林
最愛山僧能好事夜堂燈火伴孤吟

月潭寺

明 何景明

玲瓏金刹白雲邊踏閣攀林一徑穿龍出洞門常作雨

鶴巢松樹不知年僧來殿上鳴鐘飯客到山中借榻眠
怪底夜來難得寐秋風窗下遶流泉

同萬鹿園宿工文菴次韻有贈

明唐順之

何處尋山不厭深淡煙歸鳥暮鐘音去家百里訝如客
別爾經年尚此心宴坐清香滋夜氣閉門殘雪映寒林
相從一宿應堪覺機事何須問漢陰

高座寺

明蔡汝楠

雲公臺榭至今畱休暇追隨訪古遊秋色總歸紅葉寺
楚江還見白蘋洲松林月上言彌靜閣道鐘殘思轉幽
莫訝爲郎貪佛日官閒禪定兩悠悠

寓妙隱菴

明徐 綈

東風仙苑鬪芳菲家在雲林屢夢歸河畔草青鶯欲語
城南花滿蝶初飛寒生古院偏多雨苔沒空階正掩扉
畱戀曲池春更好垂楊終日鎖煙扉

宿上封寺

明童 珮

上封林處磴千盤爲訝高雲礙竹冠晴氣滿空還似雨
秋光未半忽生寒客來石上占星聚僧住巖前作鳥看
一榻偶然金磬側誰將銀漢挂闌干

重過虞山塔院蘭公話舊

明程嘉燧

湖邊春草憶佳期重放扁舟夏木滋遊戲自來通繪事
安禪久已廢吟詩半江塔影迎帆遠曲巷經聲出院遲
曾訪本師乘夜月舊房空老碧梧枝

秋晚客雞鳴寺

明顧大猷

古寺崔嵬俯帝城，攀躋漸覺旅愁輕。
樓臺寒入三山色，砧杵秋高萬戶聲。
向夕張琴依竹坐，有時待月伴僧行。
從來禪室多心賞，几席無塵夢亦清。

過愚公虎丘寺

明 吳夢暘

烹葵剝棗儘相關，坐到昏鐘始下山。
弟子可知皆白足，老夫焉得不蒼顏。
花飛日日何曾掃，柳長邛邛只未攀。
路黑出門燈肯借，畫船簫鼓幾家還。

寓極樂寺

明 王 衡

灣灣綠水帶城陰白石青蓮雙樹林萬疊雲山千里夢
六時鐘磬五更心寒燈貝葉翻香蠹春日簷花坐語禽
隨意竹牀葵菜好經簾不捲畫堂深

晚坐弘濟寺

明 阮大鍼

古柳參差掩寺門荆籬石埠自爲邨風嚴烏榜通菱浦
日落漁炊就荻根野月荒荒難辨色江峰寂寂更何言
燈前無限浮沈思銷在菰香水鶴喧

送謙選中住花涇寺

明 僧溥洽

秋風一擢入花溼楊柳芙蓉接水亭
野老尚能談故事
鄉僧爭請說新經
楸梧雨外聞啼鳥
樓閣煙中見濕螢
欲寫別離無限意
孤鴻遙沒越山青

雲谷寺法會應制

明僧守仁

寒巖草木正嚴冬
一日春回雨露濃
安石故居遺雪竹
道林新塔倚雲松
木魚聲斷催朝飯
銅鼎香銷起暮鐘
千載奎文畱秘藏
天光午夜照金容

登富春永安寺

明僧德祥

栗葉邨前石子谿青山一掩路渾迷也知谷裏多猿鳥
未信雲中有犬雞滿耳只聞諸澗響回頭方覺衆峰低
平生傾想今朝到願結茅茨在寺西

五言絕句

遊昌化山精舍

唐
盧照鄰

寶地乘峰出香臺接漢高稍覺真途近方知人事勞

宿吉祥寺寄廬山隱者

唐
楊衡

風鳴雲外鐘鶴宿千年松相思杳不見月出山重重

題奉國寺

唐陸海

新秋夜何爽
露下風轉淒
一磬竹窗外
千燈花塔西

題龍門寺

陸海

宿燈林靄裏
門磬水聲中
更與龍華會
爐煙滿夕風

善福寺閣

唐韋應物

殘霞照高閣
青山出遠林
晴明一登望
瀟灑此幽襟

薦福寺送元偉

唐李端

送客攀花後
尋僧坐竹時
明朝莫回望
青草馬行遲

題竹林寺

唐朱放

歲月人間促煙霞此地多殷勤竹林寺更得幾回過

遊道林寺

唐戴叔倫

佳山路不遠俗侶到常稀及此煙霞暮相看復欲歸

和韋開州盛山宿雲亭

唐張籍

清淨當深處虛明向遠開卷簾無俗客應只見雲來

塗山寺獨遊

唐白居易

野徑行無伴僧房宿有期塗山來去熟惟是馬蹄知

遺愛寺

白居易

弄石臨谿坐尋花遶寺行
時時聞鳥語處處是泉聲
觀花後遊慈恩寺

唐
施肩吾

世事知難了應須問苦空
羞將看花眼來入梵王宮

題水西寺

唐
杜牧

三日去還住一生焉再遊
含情碧谿水重上粲公樓

牛頭寺

唐
司空圖

終南最佳處禪誦出青霄
羣木澄幽寂疎煙汎沏寥

題九日山石佛院亂峰軒

宋朱子

因依古佛居結屋寒林杪當戶碧峰稠雲煙自昏曉

其二

巖中老釋子白髮對青山不作看山想秋雲時往還

立雪堂

明高啓

堂前參未退立到雪深時一夜山中冷無人祇自知

冰壺井

高啓

圓甃夏生冰光涵數星冷窗有定中僧休牽轆轤綆

小飛虹

高啓

初看卧波影應恐雨崇朝過澗尋師去端如度石橋

避雨山寺

明汪生民

偶逐荷鋤入松關犬吠頻山僧買藥去風雨自畱人

圓覺寺晚坐

明李先芳

片片歸林鳥微微出寺鐘僧門掩秋色明月在高松

東林寺前作

明梁有譽

山色斜依寺江流曲抱邨時有山僧出殘陽獨掩門

入寺

明僧明顯

碧草通樵徑青松夾寺門
已來親眼見難去對人言

尋竹隱寺

明僧懷讓

聞鐘識寺遙小徑緣雲入
日暮冒嵐歸秋衣不知濕

高山寺

明僧德清

山城枕江流梵剎雲中起
鐘鳴萬戶開人在蓮華裏

七言絕句

題涇縣水西寺

唐宣宗

大殿連雲接賞谿鐘聲還與鼓聲齊
長安若問江南事
說道風光在水西

過融上人蘭若

唐 孟浩然

山頭禪室挂僧衣
窗外無人谿鳥飛
黃昏半在下山路
却聽泉聲戀翠微

與謝良輔遊涇川陵巖寺

唐 李白

乘君素舸泛涇西
宛似雲門對若谿
且從康樂尋山水
何必東遊入會稽

題法院

唐常建

勝景門開對遠山，竹深松老半含煙。
素月殿中三度磬，水精宮裏一僧禪。

尋盛禪師蘭若

唐劉長卿

秋草黃花覆古阡，隔林何處起人煙。
山僧獨在山中老，惟有寒松見少年。

登寶慈寺上方憶舊遊

唐韋應物

翠嶺香臺出半天，萬家煙樹滿晴川。
諸僧近住不相識，

坐聽微鐘記往年

同路郎中韓侍御春日題野寺

唐

盧綸

寺前山遠古陂寬
寺裏人稀春草寒
何事最堪悲色相
折花將與老僧看

題蘭若

唐

崔峒

絕頂茅菴老此生
寒雲孤木獨經行
世人那得知幽徑
遙向青峰禮磬聲

題淨居寺

唐戴叔倫

玉壺山下雲居寺六百年來選佛場
滿地白雲關不住石泉流出落花香

棲霞寺雲居室

唐權德輿

一徑縈紆至此窮山僧盥漱白雲中
閒吟定後更何事石上松枝常有風

題清涼寺

唐楊巨源

憑檻霏微松樹煙陶潛曾用道林錢
一聲寒磬空心曉

花雨知從第幾天

遊西林寺

唐李涉

十地初心在此身
水能生月即離塵
如今再結林中社
可羨當年會裏人

題僧院

唐張籍

聞師行講青龍院
本寺往來多少年
靜掃空房惟獨坐
千莖秋竹在簷前

宿西林寺

唐白居易

木落天晴山翠開
愛山騎馬入山來
心知不及柴桑令
一宿西林便欲回

香山寺

白居易

空門寂靜老夫閒
伴鳥隨雲往復還
家醞滿瓶書滿架
半移生計入香山

遊雲居寺贈穆三十六地主

白居易

亂峰深處雲居路
共蹋花行獨惜春
勝地本來無定主
大都山屬愛山人

題香山新經堂招僧

白居易

煙滿秋堂月滿庭
香花漠漠磬泠泠
誰能來此尋真諦
白老新開一藏經

古寺

唐元稹

古寺春餘日半斜
竹風蕭爽勝人家
花時不到有花院
意在尋僧不在花

峰頂寺

唐張祜

月明如水山頭寺
仰面看天石上行
夜半深廊人語定

一枝松動鶴來聲

夏雨後題青荷蘭若

唐施肩吾

僧舍清涼竹樹新
初經一雨洗諸塵
微風忽起吹蓮葉
青玉盤中瀉水銀

題禪僧院

施肩吾

棲禪枝畔數花新
飛作琉璃地上塵
谷鳥自啼猿自叫
不能愁得定中人

尋石甕寺上方

唐賈島

野寺入時春雪後，
崎嶇得到此房前。
老僧不出迎朝客，
已住上方三十年。

寄題宣州開元寺

唐杜牧

松寺曾同一鶴棲，
夜深臺殿月高低。
何人爲倚東樓柱，
正是千山雪漲谿。

醉後題禪院

杜牧

觥船一棹百分空，
十載青春不負公。
今日鬢絲禪榻畔，
茶煙輕颺落花風。

定山寺

唐
薛逢

十里松蘿映碧苔
一川晴色鏡中開
遙聞上界繙經處
片片香雲出院來

宿僧院

唐
趙嘏

月滿長空樹滿霜
度雲低拂近簷牀
林中夜半一聲磬
卧見高僧入道場

李侍御歸炭谷山居同宿華嚴寺

趙嘏

家在青山近玉京
白雲紅樹滿歸程
相逢一宿最高寺
半夜翠微泉落聲

宿僧舍

趙嘏

高僧夜滴芙蓉漏
遠客窗含楊柳風
何處相逢話心地
月明身在磬聲中

題谷隱蘭若

唐
段成式

風惹閒雲半谷陰
巖西隱者醉相尋
草衰乍覺徑增險
葉盡却疑谿不深

題金山寺石室

唐李羣玉

白波四面照樓臺
日夜潮聲遶寺回
千葉紅蓮高會處
幾曾龍女獻珠來

峽山寺上方

李羣玉

滿院泉聲山殿涼
隔簾微雨野松香
東峰下視南溟月
笑蹋金波看海光

登祝融峰蘭若

唐盧肇

祝融絕頂萬餘層
策杖攀蘿步步登
行到月宮霞外寺

白雲相伴兩三僧

題清遠峽觀音院

盧肇

清潭洞澈深千尺，危岫攀蘿上幾層。
秋盡更無黃葉樹，夜蘭惟對白頭僧。

其二

風入古松添急雨，月臨虛檻背殘燈。
老猿嘯狖還欺客，來撼窗前百尺藤。

題常樂寺

唐

唐球

桂冷香聞十里間
殿臺渾不似人寰
日斜回首江頭望
一片閒雲落後山

題靈峰僧院

唐黃滔

繫馬松間不忍歸
數巡香茗一枰棋
擬登絕頂畱人宿
猶待滄溟月滿時

題袁州龍興寺

唐易僖

百尺古松下寺寶
幡朱蓋盡珊珊
閒庭甘露幾回落
青石綠苔猶未乾

江上人禪居

唐僧皎然

路入松聲遠更奇
山光水色共參差
中峰禪寂一僧在
坐對梁朝老桂枝

和宿峽石寺下

宋趙抃

淮岸浮圖半倚天
山僧應已離塵緣
松關暮鎖無人跡
惟放鐘聲入畫船

七月過孤山勤上人院

宋蔡襄

青林藹藹日暉暉
薄晚涼生暑氣微
湖上清風如可載

畫船十隻不空歸

自定林過西菴

宋 王安石

午雞聲不到禪林
柏子煙中靜擁衾
忽憶西巖道人語
杖藜乘興得幽尋

金陵報恩大師西堂方丈

王安石

蕭蕭出屋千竿玉
靄靄當窗一炷雲
心力長年人事外
種花移石尚殷勤

書雙竹湛師房

宋 蘇軾

暮鼓朝鐘自擊撞
閉門孤枕對殘釭
白灰旋撥通紅火
卧聽蕭蕭雪打窗

南寺千佛閣

蘇軾

古邑居民半海濤
師來構築便能高
千金用盡身無事
坐看香煙遶白毫

歸宜興畱題竹西寺

蘇軾

此生已覺都無事
今歲仍逢大有年
山寺歸來聞好語
野花啼鳥亦欣然

常州太平寺蒼蘆亭

蘇軾

六花蒼蘆林間佛九節菖蒲石上仙何似東坡鐵拄杖
一時驚散野狐禪

中梁山寺

宋文同

上方梯磴繞巖頭誰就孤高更起樓直望漢江三百里
一條如綫下洋州

竹西寺

宋米芾

竹西桑柘暮鴉盤特地霜風滿倦顏不用使君相料理

都緣塵土蔽青山

題妙覺寺壁

宋 孫覲

葉底紅稀不見花
枝頭綠暗可藏鴉
春歸古殿蒼苔滿
一點籠燈隱絳紗

書永和寺壁

宋 朱松

來解征衣日未斜
小軒泉竹兩清華
道人法力真無礙
解遣龍孫吐浪花

遊寧國奉聖寺

宋 范成大

松梢臺殿鬱高標山轉谿迴一水朝不惜褰裳呼小渡
夜來春漲失浮橋

題照上人迎翠軒

宋 楊萬里

參寥癩可去無還誰跼詩僧最上關欲具江西句中眼
猶須作禮問雲山

遊定林寺

楊萬里

鍾山已在萬山深更過鍾山入定林穿盡松杉行盡石
一菴猶隔白雲岑

其二

半破僧菴半補籬舊題無復壁間詩祇餘手植雙桐在
此外仍兼洗硯池

寒食雨中同舍人約遊天竺呈陸務觀

楊萬里

筍輿衝雨復衝泥一徑深深只覺遲孤塔忽從雲外出
寺門漸近報儂知

其二

老檜如幢翠接連山茶作塔綠縈山僧相識渾相忘
不到山中十五年

其三

禪房寂寂水潺潺澗草巖花點綴閒忽有仙禽發奇響
頻伽來自補陀山

雨後憶龍翔寺

宋薛季宣

二峰高峙夾禪扃長落潮音逐磬聲老僧睡起絕無事
不管波濤四面生

龍潭方丈

宋樓鑰

又因寒食此中來
窗戶虛明絕點埃
山裏春風無間斷
海棠開過地棠開

秀峰寺

宋徐璣

籃輿晚泊近巖隈
精舍門臨古道開
僧子相逢便相識
十年三過秀峰來

艤舟江心寺

宋謝翱

數聲清磬出晴暮
落木人家散煙霧
風送年年江上潮

白雲生根吹不去

僧門

宋

林景熙

一閒每笑不如僧及到僧門閒未能昨夜褐袍風雪裏
隔谿犬吠入林燈

過湘江題慈雲寺壁

宋

僧惠洪

慈雲寺在古城隈月閣風軒照水開獨倚闌干秋雨後
青山相逐渡江來

巨然山寺

金

任詢

孤撐山作碧螺髻散漫水成蒼玉鱗野寺荒涼人不到
水光山影正橫陳

遊棲巖寺

金張瓚

林表招人白塔明竹間蘭芷石泉清惠崇水墨西軒景
煙帶平蕪水帶城

題濟源龍潭寺

金趙之傑

樹圍脩竹竹圍菴菴下泓然碧一潭極目荷花半秋色
小橫圖上看江南

寶巖僧舍

金宗道

寂寂鐘魚柏滿軒
午風輕颺煮茶煙
西堂竟日無人到
只許山人借榻眠

晚宿山寺

金趙颯

松門明月佛前燈
菴在孤雲最上層
犬吠一山秋意靜
敲門時有夜歸僧

真容院

金蕭貢

魔宮佛界等空虛
此理何曾屬有無
直向臺山始相見

可中還有二文殊

八月十四日宿官塔下院

金馮延登

野僧引客看脩竹拄杖入林驚暝禽一道細泉鳴蘚磴
恍如閒聽穎師琴

山寺早起

元劉因

松窗一夜遠潮生斷送幽人睡失明夢覺不知春已去
半簾紅雨落無聲

遊青蓮寺

元王惲

上方曾閣倚晴煙迴合諸峰聳碧蓮
午枕不容詩夢就
天風吹雨下危巔

上藍寺

元貢奎

古寺迴廊雪滿階
官閒因訪老僧來
一方晴日簷聲響
絕愛小窗臨竹開

淨慧寺

元鮮于樞

晚雨纔收日已西
石梁沙路淨無泥
清泉瀲灩千峰迴
綠柳陰陰一鳥啼

又戲題廣嚴僧房壁

鮮于樞

幾年門外策征驂
不料能來共一龕
壁上未須書歲月
褚河南是護伽藍

宿焦山上方

元郭天錫

揚子江頭風浪平
焦山寺裏晚鐘鳴
爐煙已斷燈花落
喚起山僧看月明

春日 upper 平坡寺

元范梈

蘿徑陰陰近百層
金輿記是昔人登
山僧苦避尋詩者

牢閉柴門喚不應

五月二十六夜宿松林蘭若
范梈

白沙寨外接飛霞行至招提日已斜
睡覺忽聞山寨語
不知今夕離吾家

白石菴
元周權

地幽山氣靄空嵐落葉蕭蕭白石菴
歸鶴一聲無覓處
松梢擎月影毵毵

遊法興寺
元胡天游

山色搖光入袖涼
松陰十丈印迴廊
老僧讀罷楞嚴呪
一殿神風柏子香

宿圓明寺早起

明高啓

客起燈前夢尚迷
滿樓殘月曉風西
應知野寺非山店
只聽鐘聲不聽雞

宿蟾公房

高啓

一禽不鳴深樹煙
明月下照高僧禪
獨開西閣詠清夜
秋河欲墮山蒼然

寄館天寧寺

明丘吉

茶爐吹斷鬢絲煙，借得禪林看鶴眠。
不道秋風何處起，一堆黃葉寺門前。

白水寺

明方廷璽

石徑逢僧一話間，白雲深處不知還。
松陰日午茶煙起，不有客來僧更閒。

永興寺散步

明皇甫汈

帝城西覓古叢林，萬木寒垂六月陰。
庭下閒花齋後偈，

門前空水定時心

弘教寺

明 王穉登

內家金像出蓬萊
千葉蓮花玉作臺
試向白毫光裏看
聖人前世是如來

歸宗寺

明 吳兆

路遶鸞谿去復迴
鵞池聞說右軍開
山僧相遇衣裳濕
雙劍峰頭看瀑來

晚投黃龍寺慧宗上人房

吳兆

幾處禪林聚似邛嶺頭風雨礪頭昏千枝燈影僧初放
一派經聲客到門

送一公還天界寺

明 范 汭

江流汨汨樹層層短笠空瓢去秣陵依舊青山風雪裏
草門深掩一龕燈

初宿海會寺

明 李 萊

靈泉流水夜淙淙月小松高鶴影雙石榻覺來秋獨冷
誦經聲滿碧山窗

闕峰普濟寺

明錢希言

闕公山繞闕公湖
捨宅年猶記赤烏
寂寂寺門霜葉裏
水禽飛上石浮屠

講經臺

明僧守仁

乞食歸來坐暝鴉
譚經每到白牛車
東風柳絮吹晴雪
猶想天宮酌寶花

題蘿壁山房

明僧德祥

青蘿壁下一僧房
長日惟燒片炷香
風在竹欄人在定

鳥銜红柿落柴牀

次韻題高齋

明僧無愠

高齋寂寂俯清池
瓦鼎香浮十二時
天曉定回松下石
蘚痕青上布伽黎

不二樓

明僧鎮澄

談經人在翠微中
縹緲煙霏隔幾重
欲寄此心無可託
長隨片月挂西峰


石林菴

明僧廣印

覺道金繩絕巘開
半空花雨濕樓臺
長林怪石皆龍象
曾受生公記別來



御定佩文齋詠物詩選卷二百三十二



總校官庶吉士臣侍朝

校對官編修臣許兆椿

謄錄貢生臣王嘉稷